

مشروع الحكواتيات

ورشة المعارف

الحكواتية: سلمى علي أحمد

التاريخ: ٣٠ أيار ٢٠١٩

رقم الأرشيف: 19-PS/ SS-004

نوع الأرشيف: للاستخدام المحدود

ورشة المعارف

بناية أنطوان فرح، الطابق ٣

شارع المنتزه، فرن الشباك

بيروت، لبنان

السلسلة/الموضوع الرئيسي	قصص من الجنوب
رقم الأرشيف	19 PS/SS -004
نوع الأرشيف	استخدام محدود—يجب استشارة الحكواتية قبل استخدام هذه المقابلة
الحكواتية	سلمى حسين علي أحمد
تاريخ ميلاد الحكواتية	1930s
تاريخ ومكان المقابلة	٣٠ أيار ٢٠١٩
ملخص التاريخ الشفوي	تسرد سلمى علي أحمد قصة حياتها، من طفولتها في النبطية في الثلاثينيات والأربعينيات الى أيامها الحالية بعد تقاعدها. تتكلم عن عائلتها وعن ذكرياتها الصيفية التي كانت تقضيها في بلدة بلاط الجنوبية. تحكي عن ألعاب الأولاد القديمة وعن الطقوس الاجتماعية والدينية، من الأعراس الى عيد المولد وعاشوراء ورمضان. كما تحكي عن حبها للتعليم وعن تأسيسها لجمعية تقدم المرأة وانطلاق الجمعية عام ١٩٧٠ بنشاطات اجتماعية مختلفة، وعن كفاحها للمحافظة على مقرّ للجمعية، خصوصاً أيام الحرب ثم حين أرادت سرية الدرك مركز الجمعية. كما تتكلم عن زواجها وعن مرض زوجها بالألزهايمر.
معلومات عن الباحثة	نسرين رجب هي كاتبة حاصلة على شهادة الدراسات العليا في اللغة العربية وآدابها.
التفريغ	ديانا خنافر
الترجمة والتدقيق	ديمة قاندييه
الكلمات الدلالية	النبطية-الثلاثينيات-الاغتراب-التجنيد الاجباري-الارجنتين-الأهل-السيرتيفيكا-الطفولة-بلاط-تعايش-ألعاب-سينما امبير-خان الحمير-اسطنبولي-جبل عامل-مظاهرة-رجل دين-الشيخ أحمد رضا-التبغ-ميدفون-ناظرة-معلمة-حضانة-مرشدة اجتماعية-مدرسة الاميركان-لقاية-أعمال المنزل-العاشوراء-عيد المولد-الندابيات-الفلّة-الأعراس-الجيران-رمضان-مسحراتي-أدوية-أعشاب-مطهر-مؤمنة-بنت جبيل-المدرسة الرسمية-فريحة الحاج علي-النموذجية-جمعية تقدم المرأة-تدبير منزل-الروضة-غادة جابر-أمومة-الأم المثالية-كفر جوز-تمويل-دعم-الزهايمر-أولاد-الوحدة

Rights of Ownership for the Storytellers Project

The Knowledge Workshop holds full or co-ownership of all items that it archives and publishes. Recordings published on the Knowledge Workshop website can be used only for cultural, educational and non-profit purposes, and never for commercial purposes. To use the material on our website, including the oral histories and their related images, we ask that you always reference the Knowledge Workshop with: Storytellers's name, interviewed by Researcher, Date, The Storytellers Project, the Knowledge Workshop, Beirut, Lebanon, page number. [Ex. Nazik Saba Yared, interviewed by Deema Kaedbey, 2017, The Storytellers Project, the Knowledge Workshop, Beirut, Lebanon, pp 12.] To use the limited-use items held within the Knowledge Workshop, you can visit our office in Furn El Chebbak and fill out a permission form. You can use these items inside the Knowledge Workshop space, but we request that you consult with us on which items you can use. Some of these items require permission from the storytellers before being used.

حقوق ملكية لمشروع الحكواتيات

لورشة المعارف ملكية تامة أو مشتركة للمواد التي تؤرشفها وتنشرها. التاريخ الشفوي المنشور على الصفحة الالكترونية لورشة المعارف يمكن استعمالها فقط لأهداف ثقافية وتثقيفية لا تبغى الربح، ولا يمكن استعمالها لأهداف تجارية تبغى الربح. لاستعمال المواد على صفحتنا الالكترونية، من ضمنها التاريخ الشفوي والصور المرافقة نطلب منكم التنويه بورشة المعارف كمرجع باستعمال: اسم الحكواتية، قابلتها اسم الباحثة، السنة، مشروع الحكواتيات، ورشة المعارف، بيروت، لبنان، الصفحة. [مثلاً: نازك سابا يارد، قابلتها ديمة قاندييه، ٢٠١٧، مشروع الحكواتيات، ورشة المعارف، بيروت، لبنان، ص. ١٢]

لاستعمال المواد المحددة الاستعمال الموجودة في ورشة المعارف (الغير متاحة على صفحتنا)، يمكنكم القدوم الى مكتبنا في فرن الشباك وتعبئة استمارة الطلب. بالإمكان استعمال هذه الموارد داخل ورشة المعارف، لكن نسألكم ان تستشيرونا عن أي مواد يمكن استعمالها. بعض هذه المواد تتطلب طلب من الحكواتيات قبل استعمالها.

نسرين رجب: [00:00:03] مرحبا، اليوم الخميس 30 أيار 2019. أنا بالنبطية في منزل السيدة سلمى علي أحمد، عم بأعمل مقابلة تاريخ شفوي لصالح ورشة المعارف. شكرًا سيدة سلمى أول شي عالمقابلة.
سلمى علي أحمد: [00:00:18] أهلا وسهلا.

ن.ر.: [00:00:19] أول سؤال، بتخبرينا عن حالك، اسمك، وأي سنة خلقتي؟

س.ع.أ.: [00:00:25] بالتذكرة، سلوى علي أحمد. بس عامّة، سلمى. يعني ما حدا بيعرف سلوى غير بالمعاملات الرسمية وبالذوائر الرسمية. أما كل العالم بتعرفني باسم سلمى. ولدت بالنبطية، بالتلاتينات. من أب شَبّ ببلاد الاغتراب. كان صغير شب، وسافر مع بيو وقت الحرب على الارجنتين. كتار من اللبنانيين لهربوا من التجنيد الاجباري وغيرها. هادي كتير اكتسب، يعني أخذ صفات حلوة، وإن كان يعني مصداقية البلد لكانوا موجودين. إيه. هيدي كتير يعني عكست على تربية على تربيتي أنا وإخوتي. إيه. بقى، كان في صراحة وثقة وحرية بعمر، وقتها كان كتير الحرية استثنائية بين الذكور والإناث. بينما بحسن خبرته وتدريبه وتعاونه مع والدتي، مع زوجته، كان يساوي بين أولاده بالحقوق والواجبات على السواء.

ن.ر.: [00:02:18] ممم— وأيا بتحبي إنتي، سلمى أو سلوى؟

س.ع.أ.: [00:02:21] وبالنسبة— نعم.

ن.ر.: [00:02:23] إيه كملتي تفضلي.

س.ع.أ.: [00:02:25] وبالنسبة إله للوادة، بتسأليني، كمان الإم يعني عنجد مش كونها بس إمّي. بس بعترّ بصفاتها، بأخلاقها، بنموذجية تعاملها وعلاقتها مع العالم، ومحبتها للخير، تضحياتها— يعني كان كتير صفاتها أثرت فيّ وأعطتني كتير من، من أخلاقيتها ومن تعاملها. إيه—

ن.ر.: [00:03:10] قلتيلي إنه اسمك المتداول سلمى وبالهيوية سلوى.

س.ع.أ.: [00:03:15] سلمى وأكيد—

ن.ر.: [00:03:16] كيف اكتشفتي إنو اسمك سلوى؟

س.ع.أ.: [00:03:18] [تضحك] هيدي كتير حلوة. سنة ألي بدي قدّم على الشهادة الابتدائية السيرتيفيكا [Certificat] وكانت يومها السيرتيفيكا أهم شهادة. يعني بالتلاتينات، بالأربعينات بالأربعينات كانت مهمة كتير يعني لبيجحها بيفرحوا الاهل ببينسطوا فيه. "ابني أخذ شهادة"، و"بنتي أخذت شهادة" وبيصير في توزيع المرطبات وتهاني وغيرها. بقى هيدي بهل مرحلة معلمة الصف تطلب من البنات يجيبوا الهوية التذكرة حتى تقدم طلبات للتقديم على شهادة السيرتيفيكا. بقى جبت أنا التذكرة وناولتها إياها، تفاجئت بتعيطلي قدام الصف كله "تفضلي تعي شوفي شو اسمك". بيه! الكل أنطعوا، الكل بيعرفوا إنه اسمي سلمى، شو هي؟ جيت قريت سلوى! قالتلي "بذك من هلق تيلشي تتمرني على اسم سلوى، لأن بالامتحانات ان كتبتني سلمى بتسقطي، لأن بالتذكرة سلوى". جيت وقتها عالبيت لعند الوالدة، الله يرحمها، قتلها "شو قضية سلوى وسلمى!". ضحكت هيك عسجيتها، قالتلي "وقتها خلقتي للسبعة أشهر والولاد لبيخلقوا بهل فترة بيكون في خطر على حياتن. بقى لما ربنا سلمك، غيرنا وسلمى". يعني هتي لغبروا هتي لحوطوا [تضحك] وهتي لاقتروا. بقى هيدي قصة سلوى وسلمى.

ن.ر.: [00:05:21] كنتي عايشة بالنبطية كل طفولتك؟

س.ع.أ.: [00:05:25] بالنبطية. إيه بالنبطية—

ن.ر.: بتتذكري كيف—

س.ع.أ.: [00:05:29] لأن اتزوج الوالد هوّي من بلاط، قضاء مرجعيون الوالد. وقت لإجا من الغربية، إجوا عرفوه على الوالدة بالنبطية، من بيت جابر، إحدى العائلات العريقة بالبلد. وصار النصيب والسكن وال-- كله بالنبطية. كان إنا أو للضيعة بلاط كان إله حصة كبيرة بحياتنا. هيدي كمان منشرلكن إياها.

ن.ر.: [00:06:09] كيف كانت النبطية وقتها؟ بتتذكري شي مثلا

س.ع.أ.: [00:06:13] النبطية. أول شغلة لكان يلفت نظري من خلال الوالدة وأصحابها والعيلة والبيئة لعاشية فيها بتلاحظ فيها القناعة لأن هلق مفقودة. القناعة. بعدين كان في كتير حياة صعبة. يعني كهربا ما في، الغسيل عالأيدين، الطبخ على أكيد إما البابور أو الكاز، وكمان ما في لا برّاد ولا شي. كانوا كل يوم بيومه يعملوا الاكل. وما في نق، هاي أهم شي، ما في نق. بهل إيام رغم-- يعني قبل هل هل سنوات البشعة، قبلها، كانوا هون يضل في نق مع إنه كل شي مهيلن. ما في نق، في قناعة، في تعاون، في إلفة. هيدي شغلة. شغلة تانية، أكيد كان في مثلا جماعة ميسورين، جماعة يعني فقراء أو وسط. إيه. بقى بالنسبة لإنا كنا يعني الحمد لله. الوالد عنده محل قماش وبالنبطية، فش غير محلين يعني بيقصدوهن من المنطقة كلها بيشتروا تياب للعروس وغيرها. بقى الحمد لله كنا ميسورين نسبيا. بس كنت أنا وصغيرة اسمع بالإعاشة، يعني الإعاشة، يعني كان في ضيقة. وكان في فقر. بيجوز بيعطوه على عدد أفراد كل أسرة حصص غذائية. هيدي شغلة. شغلة تانية، ما في وسائل اتصالات، سيارات وغيرها. كان كله مشيا على الاقدام. يعني حتى الوالدة، أصحابها، زيارات من بيت لبيت وحتى أبعد بالمنطقة، يروحوا مشي. طلاب. ونحن مرقتا كمان لأن ما، بالأربعينات بعدين بالخمسينات لمن بلّشت بالتعليم، كله هل معلمات كلن مشي. ما في لا أوتوكارات ولا سيارات. في كانت بوسطة النبطية-بيروت وسيارة أو سيارتين كمان، وإلا ما في غير بالشتوية بالحر بالبرد بالتلج، ما في أبدا أي-- مثل ما قلت، نق. هيدي ملاقينها شغلة طبيعة. بقى نيحي عالمدرسة

س.ع.أ.: [00:18:06] هيك ما في—

ن.ر.: بمعاملة الأهل؟

س.ع.أ.: [00:18:10] لأ بس— يعني— ابقى لاحظ الأهل، هيدي كثير مهزومة، يبجوا رفاقنا وبعدين كان الوالدة صدرها واسع. والبيوت إنه ما كانت إنه شقة و هيك، لأ. كان كل بيت وفي قدامه مماشى وفي قدامه جينة. يعني نحنا خمس بنات، لو كل وحدة بدا يبجي رفاقها. بقى مرات نلاحظ الوالدة تقول لبعض من رفاقنا "اليكي إنتي هلق إمك عم بتعطلك، وإنتي هلق كمان إمك بتكون بدأ إياكي". نحنا نتضايق، يمكن هول منحبن كثير ومنلعب. الأهل ينظروا لبعيد. يمكن لأنه لا سم الله يمكن لأنه عيلة من عيل وكلن، بس يلاحظوا إنه في فرق بالتربية. هنّي، هنّي يعرفوا ليش بعدن. نحنا كثير نتضايق. إنه هول منحبن، شو دغري بعنتن عيبتن؟ إيه يعني مش لا سمح الله تفرقة أو شي، هنّي إن خط بالتربية هيك بدن يحافظو عليه. بس هادي كانت بس الكل كل البيت مفتوح للكل.

ن.ر.: [00:19:45] كتنوا تروحوا ضهرات و هيك؟ وقت مثلاً كزدورة العصر، هول القصص لما كنتي صبية أو شي؟

س.ع.أ.: [00:19:55] يعني عند أصحابنا. عند أصحابنا إيه. إيه. عطول في زيارات. وبعدين في شغلة. هلق نبقي مثلاً رفاقتي إنه من طبقة إنه ميسورة أكثر. وبيت وفرش وغير. بس ولا مرة حدا أتطلع أو أتمنى إنه ياريت بيتنا هيك. أبداً. بعنقد إنه هول معن مصاري وغنايا لازم يكون بيتن هيك. إيه كانت كثير هيك الحياة طبيعية وسهلة.

ن.ر.: [00:20:39] ما كان في أماكن تسلية مثلاً توحوا عليها، سينما أو—؟

س.ع.أ.: [00:20:44] هيدي شغلة مهزومة كثير. إجا شخص من أفريقيا ومعه مبلغ بده يشغله. اقترحوا عليه قالولو بركي بتعمل سينما لأن ما في سينما بالبلد. بيقوم بيعمل سينما، بس وقتها عملولو يعني هيك مش شعر، هيك بتعرفي،

ن.ر.: موال؟

س.ع.أ.: [00:21:19] إيه وقت إنه بدن يوصفوا السينما لأنه استأجر بمحل كان خان، خان للحمير. إيه، قاموا قالوا بخان الحمير ركبوا الزوار، لأ بخان الحمير ركبت الهاي وسموها ال[empire].

ن.ر.: أه الأمير

س.ع.أ.: [00:21:53] عن السينما بخان الحمير. بخان الخمير [تحاول أن تتذكر] بخان الحمير، مثل بهل معني، رتبوا الصور وسموها ال[empire]. كانت تُخر ويقولوا ساعة من المكنة وعشرة من الموتور، يعني هودي [غير واضح]. بخاتن الحمير— كثير حلوة

ن.ر.: [00:22:33] رحتي شي مرة عليها؟

س.ع.أ.: [00:22:37] إيه إيه، مثلاً "بخان الحمير، رتبوا الصور وسموها ال[empire]. وأنا شايفك مش رح تمشي كثير. ساعة من المكنة وعشرة من الموتور". لأن كلنا صغار نروح وعم نحضر، شوي تخرب.

ن.ر.: شو كتنوا تحضروا؟

س.ع.أ.: [00:22:56] [تتابع] بيلاً بيلاً بتيجوا بكارا. إيه. بقى عملوها هاي إنه [تضحك] بيكونوا عم يحضروا يعني هيك سينما، هيدي يعني هيك يا دوب متذكريتها. يعني نيحي مقهورين إنه لما منحضر كان من زمان أكثر شي ما بعرف— كان هيك ممثلة بدوية يعني ناسية بس— بس كان بحضر ونضهر مقهورين لأن "بيلاً بيلاً بكارا بتيجوا". إيه، هيدي السينما وبعدين اتوقفت. أكيدة مرقت فترات وسنوات وهيدا، وصار في بدل السينما تتين وعمستوى يعني. إيه. هلق الجهتين موقفين بوجود هل وسائل التواصل الاجتماعي وال--

ن.ر.: [00:24:16] هنّي مرة رجعوا فتحوا السينما بالنبطية رجعوا وقفوها، قاسم اسطنبولي--

س.ع.أ.: [00:24:22] هاي مشيت فترة، مشيت فترة وما، ما استمرت كثير.

ن.ر.: ليش قولك؟

س.ع.أ.: [00:24:29] لأنها عطول بتخرب [تضحك] و--

ن.ر.: [00:24:33] قالوا ما في دعم لإلها أو شي؟

س.ع.أ.: [00:24:36] لا لا لا. بقى هاي شي متذكرة إنه نيحي نحضر ومبسوطين، شوي يخرب. إيه عملولو إياها "بخان الحمير، رتبوا الصور وسموها ال[empire]. أنا شايفك مش رح تمشي كثير. ساعة من المكنة وعشرة من الموتور". هيدا عملوها تركيبة عليهم لهل-- إيه ما طوّلت كثير وبعدين--

ن.ر.: [00:25:12] قلتيلي بعدين عملوا رجعوا غيرن؟

س.ع.أ.: [00:25:15] إيه بعدين صار في أكثر. يعني دور سينما تتين. إيه. وكانوا ماشيين.

ن.ر.: [00:25:22] إيه وليش وقفوا، وقتها؟

س.ع.أ.: [00:25:24] وقفوا يعني أكيد، الظروف أكثر شي-- الظروف ال-- لمرقت، إن كان قبل إسرائيل وكان في الانتداب الفرنسي وكان في المظاهرة ضد الانتداب وقتها، وبعدين لمن إجا الفلسطيني هاو كلن بالأربعينات. كمان صار في هم جديد، صار في وضع وضع مش طبيعي لتأمني. الفلسطيني جايين على أساس هودي جمعيتين وراجعين. دغري الأهالي أكيد استقبلوهن ببيتوهن وقدموا لبيقدروا عليه، بعدين عرفوا إنه هيدي خدعة وخلص. ساعتها صار عندن مخيم والباقي

الميسور استأجر وصار وابتدأ العمل الفدائي المظبوط، بنظرهن لاسترجاع فلسطين ويرجعوا عبلدهن. وكان دور للأهالي كثير منعتزّ فيه. يعني كانوا بالمظاهرات، إن كان نسوان أو رجال أو صغار، يساواوا المظاهرات، بالمساعدات، بالحنى كنزة الفدائي. يعني بذكر أنا ورفقاتي بنشغل كنزات إنه للفدائيين. كان في تعاطف وحماس وهيكي للعمل الفدائي. وبالفعل يعني دفعنا الثمن غالي، مثل ما بيقولوا.

ن.ر.: [00:27:20] وكيف خمد هيدا الحماس؟ قلتيلي كان في حماس أول شي للعمل الفدائي—
س.ع.أ.: [00:27:24] إيه

ن.ر.: وكيف بعدين راح هيدا الحماس؟ ما بقي في حماس؟

س.ع.أ.: [00:27:29] هيدي بترجع للسياسة. عصعيد عالمي، عصعيد مثل هلق. مثل هلق يا قلبي. في شغلات خارج خارج إرادتنا لأن في في جهات بهمها إنه يضلوا الفلسطينيين هيكي مشتنتين وإنها إسرائيل، مثل ما هلق عم منشوف من سيئ لأسوء، إيه بقي للأسف. تغيرت--

ن.ر.: [00:28:15] كنتي تشاركي بمظاهرات؟

س.ع.أ.: [00:28:17] عطول عطول.

ن.ر.: [00:28:20] بتتذكري شي موقف مثلاً كنتي فيه بمظاهرة؟

س.ع.أ.: [00:28:25] كئا نمشي قدام الكل، وبعدين يعني الأعلام بالأيام كان العلم الفلسطيني، أو وقت الجزائر وقت حرب الجزائر أوو يبقى صوتنا "الجزائر عربية! يا طلاب الحرية!". عطول عطول في روح بالنبطية وبالجنوب يعني جبل عامل، على صعيد وطني على صعيد أدبي عصعيد علمي عصعيد-- كان مميز.

ن.ر.: [00:29:08] حكيتيلي عن صببية كانت بالمظاهرة وشلحت وقتها حجابها أو شي؟

س.ع.أ.: [00:29:14] لأ. هيدا - مش-- وقتها كانت المظاهرة ضد الانتداب الفرنسي. ويعني ضهرت البلد بنسوانها برجالها بصغارها بالكل. واجتمعوا بالساحة. وكانت المفاجأة إنه طلعت بنت، هيكي 14 سنة تقريباً، وكان وقتها في حجاب يعني بنسبها "رمية"، بتغطي وجهها بس بقماش شفاف. هيكي سودا أو شي. وقفت وهبت قالت شعر. [تتذكر] يعني بذكر— [تتذكر] إيه لحظة لإتذكر منيح--

ن.ر.: [00:30:20] حاسبها حدا وقتها؟

س.ع.أ.: [00:30:24] نعم؟

ن.ر.: إنه حدا حاسبها إنه ليش هيكي عملتي؟

س.ع.أ.: [00:30:29] أه لأ. اتصوري أبوها قاضي، يعني رجل دين، وجدّها عالم بالنبطية، الشيخ أحمد رضا. يعني حفيده الشيخ أحمد رضا، وتوقف وتقول شعر وممنوع صوت المرأة، من زمان إنه صوت المرأة مش، مش مشكور أبداً. بقي انقسم، انقسم الجمهور. قسم كثير اتحمس وزقولها وكانت مفاجأة حلوة. وقسم ثاني راحوا عند جدّها "قوم شوف حفيدتك صوتها طالع بين الرجال!". جاوبن "عفى عليها، عفى عليها من موقف مشرف". رجعوا، مثل ما بيقول المثل، "يا كبّاح يا--". رجعوا هيكي مفنوسين هني افنكروا إنه بدن-- إيه هيدا موقف يعني كمان هيكي بتذكره "يا فتى يعبر اليوم نضال، قم ودافع عن حقوق العرب"، بهل معنى. إيه. مش متذكرتها. بقي كانت كتبيير هيدي. وبقي الحجاب عفترة، يعني ما بقي على طول. إيه لفتره. بعدين صار إيشارب [echarpe] بعديين الأكثرية بلا إيشارب بلا شي. بس أكيد إمياتنا، إمها وهداكي ال[غير واضح]، بقيا بس ما عادوا كمان كان لبس كثير، يغطوا وجن. بعد الزري لكانوا، بتذكر وقت المسلسلات بسوريا "الحارة"—
ن.ر.: باب الحارة، إيه

س.ع.أ.: [00:32:37] هل لبس بعدن لبس تقليدي لبيليسوه. هول بتذكر، يا إمي بتذكر الوالدة مرقت فترة شفتها لابسة هل لبس، بعديين لتغير. صار رمية، بعدين صار مندبل أبيض، على طول يعني.

ن.ر.: [00:32:58] إنتي اتحجبتي كنتي وقتها؟ قديه كان عمرك لما اتحجبتي؟

س.ع.أ.: [00:33:05] اتحجبت شو، يعني وقت لما تصير وحدة 13 و14 أو قبل يمكن هل وقت، إيه لبست رمية بس شو؟ نفوت على المحل نشيل الرمية عن وجنا [تضحك]، كان مثل اللعبة. بعدين شلناها. إيه—لأ ما مرقت

ن.ر.: [00:33:47] قلتيلي كنتوا تحطوا هيدي الرمية عوجكن، بعدين شلنوها لأنه كانت لبكة عليكم يعني؟ [صوت امرأة من خارج الغرفة تتكلم مع سلمى]

س.ع.أ.: [00:33:40] شو بها؟

ن.ر.: عم ثقك طفتوا. يعني أهلك ما عراضوا وقتها إنه لأ، لازم تلبسي حجاب أو شي؟

س.ع.أ.: [00:33:52] لا لا لأ. كانت هيكي، تطور طبيعي يا قلبي. لبست حجاب كان يعني شي طبيعي إنه الكل محجبين. وقت لبش يتراجع شوي، يتراجعوا بشكل عفوي. إيه ما عملت ضجة إنه-- لأن بقي لبس، لبس كمان لبس محترم، يعني ما كان في لا تزيط ولا بنطلون هيكي قد الجسم. لأ، لبس محترم، لبس محتشم. عشان هيكي ما بتفرق. يعني إيشارب هلق. بعدين وقت، بعد دروسي وتعينت ما عدتس حطيت شي عراسي. إيه—بعدين، اتغيرت وقت اتزوجت، كمان صرت هيكي حط مندبل لأن زوجي ابن عالم، إيه. بس كان شي طبيعي يعني. ما في هل تزمت، ولا فيه هل خلاعة. هيدا لأ. كان في حشمة.

ن.ر.: [00:35:33] بتذكري شي عن حياة إمك؟ حياة إمك، إمك كيف كانت؟

س.ع.أ.: [00:35:41] كانت يعني عنجد اجتماعية بشكل، إنه مدرسة الأميركان يلّي هلق اسمها الانجيلية. كانت أول ما استأجروا بيت ملاصق لبيتنا يعني، نضهر من البوابة نفوت عالمدسة. من هون كانت علاقتها مع المعلمات، بالفرصة يجوا كلن، [غير مفهوم] هيك اذا عندن مشكلة يجوا يشكولها همّن، ويعدين الرئيسة أميركية مس ولسن [Miss Wilson]. كانت شو الوالدة علاقتها معها بمعنى إذا شي بنت طردتها شي تلميذة طردتها المدرسة، تلبس مندليها الوالدة وما في [تضحك] لا تاخدي موعد ولا تليفون ولا شي. دغري بتلبس مندليها وبتروح تقابل [Mrs] يعني تتوسط إنه هاي إذا بتسمحي طردها حرام لأنه هادي باثر عليها وأهلها بدن إياها. إيه. نقلها تكرمي! معناها كانت علاقتها الاجتماعية وحياتها، هيدي كتير تركت يعني هاي كتير أعطتني. يبقى عندها أمثلة، يا عمّي! الوالدة وراعيلها، بس اتعلموا القرآن. ومن خلال القرآن، يعني بيحي مكاتب من أفريقيا ها، بتقراهن. إذا مجلة جريدة، بتقرا. بس تكتب اسمها، ما بتعرف. ممنوع كان عليهم يمسكوا القلم، إيه إيه، أحلى ما يصيروا بدهن، بتعرفي العقلية من زمان يتواصلوا أو يكتبوا رسائل وغيرها. بيضهروا خاتمين القرآن ولبيختم القرآن قادر يقرا. بقى القرآن والأدعية كلها بتعرفها. ابقى مرّات مثلاً إيحي متضايقة، إيحي إنه يعني عملت شغلة ولا قالولي إنه يعني كتير شغلة مهمة. قامت عطنتني "ازرع جميلاً ولو في غير موقعه". يعني أنا يمكن للبريفيه لعرفت الشطر الثاني. أو مثلاً مرات ازعل، ازعل إنه رفيقتي أو هيك بدي، بدي حاسبها. بتقلّي "يا إمي، العتاب ذلّة والنسوط حرية". يا عمّي هاي! هاي يلّي أمية، شو هاي؟ ومرة جيت عم بيكي لأن العلامة ما عجبتني بالمدرسة، إنه فيها ظلم فيها شي. شو كمان—قالتي "ليبيك بيكي عليك، وليضحكك بيضحك عليك". يعني اتصوّري اتصوّري هيك انسانة بعمر معيّن، بزمان معيّن، مع القرآن-- يعني وقت لتروح عالانتخابات تبصم لأنه ما بتقدر تكتب اسمها ولا بتعرف تكتب اسمها، حتى نحنا وعينا وصرنا نروح علمناها تكتب اسمها. وإلا الأدعية بتقراهن، كمان أيّة جريدة أية رسالة-- اختي وقت لسافرت وهيدا. كان عندن، هيتي ورحيلها كان عندن ميّزات. كان صداقة عنجد مش لفترة. إنه هلق أنا بحاجة لإلك، تمام. بعدين ما بعود بعرفك. يعني تقريباً مثل معظم الأوقات بهل الأيام. إيه لأ. هنيّ أبداً، هادي مش واردة أبداً. بقى هيدي كلها اكتسبناها.

ن.ر.: [00:40:09] بتذكري كيف كانت تربيكن مثلاً؟ إنتي واخواتك؟ انتو كنتوا تيجوا تدرسوا دروسن لحالكن يعني، أو هيتي بتقلن هيدا وقت درس هلق؟

س.ع.أ.: [00:40:27] ولا مرة إنه، يعني لازم حدا يرافقتنا أو شي. لأ لأ. كان طبيعي. يعني الوالد عنده متجر والأساتذة بييقوا قاعدين قدام المحل يقعدوا هونيك. إيه نروح عالمحل نحنا، عند الوالد وهيدا، كلّه كان شي طبيعي. ما في، ما في يعني، هيدا بالوسط ألي بتذكره. إيه، كان كله هيك مبسّط وطبيعي وما في أبداً إنه "وين رحتي؟ وين جيتي؟ وكيف كذا؟". لا لا. في ثقة. يعني في تربية معينة، هاي بتريّح الاهل. كيف ربوا، بيلاقوا. بقى الحمد لله.

ن.ر.: [00:41:20] كان في عقاب؟ كنتوا مثلاً تتعاقبوا إذا إذا--؟

س.ع.أ.: [00:41:25] نعم؟

ن.ر.: كان في عقاب، مثلاً تعاقبكن إذا عملتوا شي غلط أو هيك؟

س.ع.أ.: [00:41:30] أكيد. أكيد. أكيد كان في عقاب

ن.ر.: [00:41:32] كيف كانت وسائل العقاب؟

س.ع.أ.: [00:41:34] يعني في محاسبة وفي إيه. وفي مثلاً يمكن يكون في رحلة، تحرمني عالرحلة لأن أخطأت بشغلة معينة. يعني تحرمني عن شي بحبه. بس أما ضرب وقتل وعنف وهيدا، لأ الحمد لله. ما كان موجود لأ.

ن.ر.: كان في حدا يساعدها بالبيت؟ أو هيتي لتقوم بأعمال البيت كلن؟ كان في حدا، وحدة مثلاً، تيجي تساعدها بالبيت؟

س.ع.أ.: [00:42:13] كان عندها، لأنه كانت كل سنة تجيب ولد. كانت كتير يعني صعب لمن ولدين يعني بيكون عمره الولد بعده إن كتّر سنة بيكون إجاها ولد. إيه. ورا بعض جابوا الولاد. كانت كتير سهلة. يستعينوا ب بالمنطقة. يعني، بتيجي مثلاً بنت من شي ضيعة هيك بحاجة لشغل. إيه. بقى كانت أكيدة تعاونها. بس كمان كان في شغلة كتير خدمتنا فيها الوالدة. إنه كانت تشغلنا. رغم في وحدة. بعرف وقت لبدها، الغسيل نغسل عدينا. أبداً. تقعدني أنا وإختي وتقسم مين أول شي ومين بيعطي للثاني. أو إذا في للطبخ ما كانوا يدقوا لحمه على البلاطة، مش مولينكس [Moulinex] وغيرها. كمان كمان. كان الخبز لمن بالشتا يخبزوا المرقوق، أكيد تيجي وحدة هيتي يعني اختصاصها خبز المرقوق، تيجي وتنام ليلتها عنّا ليعملوا ل10، 15 يوم لأن تيجي عيانة كتير شتا وما فيهن يشترّوا. بس بالحالات العادية نبقى نعجن بالبيت، يعني أعجن نعمل "كماش". هول هلق لعم نشترّيهن. نعجن وبالشوبك ونرقن و-- يعني كان إلنا دور. إيه.

ن.ر.: [00:44:32] شو كان اسمها البنت لتستعين فيها؟ اسمها "لقاية" أو شي؟ أو مش مارق عليكي هيدا الاسم؟

س.ع.أ.: [00:44:39] إيه-- يعني هيتي بقولوا لقاية. بس نحنا بالبيت أكيدة ما منعيط كذا. كذا هيك إذا مش كبيرة كتير لم بدنا نلعب نلعب معنا وهيدا. ومرات ما تلاقي، تلاقي ست كبيرة بالعمر. يعني لو إجت، إلا تساعدها بناحية معينة. وقت لما بتلاقي وحدة صغيرة. إيه كانت ميسورة. كانت العالم بضيقة ويلاقوها طبيعية. طبيعية إنه اشتغل بالبيت يعني. مش إنه--

ن.ر.: [00:45:06] يعني كلمة "لقاية" كانت ثقيلة شوي أو ما بتعرفي شو معناها؟

س.ع.أ.: [00:45:11] ما بتذكر، ما بتذكر شي. بعرف نقعد نحسبن كم وحدة صرنا مغيرين وهيك يعني، ما. إيه.

ن.ر.: [00:45:23] شو أكثر شي تأثرتي فيه بعلاقتك مع إمك؟ شو أكثر شي أثرت فيه إمك؟ إمك كيف أثرت عليكي؟
س.ع.أ.: [00:45:31] أثرت عليّ-- اجتماعياً، وبعدين سعة الصدر وبعدين التسامح لأن بيمرق الواحد بظروف كثيرة، فرق ما يستصعب أي أمر، فرق ما يتقبل هل شي هيكي ب برحابة صدر. بقى أمور كثيرة ساعدتنا بالحياة، من خلال ما نشوف أسلوبها، نشوف معاملها، ونشوف كيف. إيه. اكتسبنا إشي كثيرة.

ن.ر.: [00:46:26] بتتذكري عادات وتقاليد كانت تصير؟ عادات وتقاليد كانوا يعملوها؟ أهلك مثلاً؟
س.ع.أ.: [00:46:34] يعني كان وقت عيد المولد. عيد المولد يجتمعوا، يجوا الكل مثلاً بهل حي أصحابين، بيعتولن خير. يجوا يقروا المولد ويوزعوا بتذكر هيكي صرر يعملوها هني من قضاة، كانوا يسموها قضاة. يعني حمص بسكر هيكي. هو هاي يضيفوها. وفي أناشيد بيعرفوها يقولوها. كثير تيجي هيكي شغلة طبيعية وحلوة وينبسطوا و. إيه. وبعدين كمان العاشوراء. هيدا يعني من وقت لفتحت عينينا منعرف إنه في شهر محرّم وفي عاشوراء عشرة أيام، جيراننا بيت السيد يعني بيت عالم، مرتة وإمه هني يقروا المجلس، وكمانا بيت شيخ البلد. يكونوا مثلاً بهل بيتين وغير، يعني هيديكي اليوم بوقت محدد نحضر بهل بيت، يكون مجموعة كبيرة وبالحوالات يومية لأ يكون في نساء هني مهيتين يروحوا عاليبوت. أكيد لقاء مبلغ، إيه، يروحوا عاليبوت يقروا شي من السيرة الحسينية ويقوا كتار يعني. هو بالنهار. إيه. وبالليل، الرجال يعني يضهروا، نسمع يعني هيكي بعض ال-- يعني مش الأغاني، النذائيات وهيكي يعني إيه. بس كان ننسبط، ننسبط أكثر شي آخر يومين. يجوا قرايب الوالد من بلاط ويجوا جايبين منتوجات الضيقة. وعاملين زلابية، ويجيووا التين المجفف ويجيووا الزيتون ويجوا يناموا عنا البيت. شو كان، يعني ننسبط! لأن يجوا يناموا ليلة ليحضروا العاشوراء. يبسموها "الفلة". وبعد العاشوراء، بس كان عشرة أيام يبقى مثلاً بالحسينية "بتّ الثواب" وترجع العالم لحياتها الطبيعية. هلق أكيد لأ. يمكن شهر محرّم وشهر صفا يعني بيتذكروا كل الحوادث بتفاصيلها. بقى إيه. كانت [غير واضح] من زمان للعشرة أيام وخلص.

ن.ر.: ورمضان كيف كنتوا تعملوا؟ كانت إمك تبعت معي أكل للجيران خبرتيني؟
س.ع.أ.: [00:49:50] رمضان-- رمضان كثير حلو ونبسط. المسحراتي وقت بدنا نسمعوا رح يجي وعمّا بيدق على الطبل أو الدربكة كان، إيه. ما البلد شو على كبرها ما يعني الكل يبسمعه. بقى يمرق عكل بيت. "يا فلان [يسموا اسمه]، يا أبو محمد، وحدوا الله!". شو انكيف! بالأول لما كنا صغار ما يخلونا نقوم، بس نكي ونقلها نقوم بدنا ننسحّر. إيه. وتاني يوم قال بدنا نصوم، وبين الساعة 10 كنا نكون ماكلين كزا أكلة. ولمن كبرنا كمان أكثر، صرنا نصوم إنه كل النهار بس شو، شو نجتمع أكل وشغلات هيكي طيبة إنه بس نُفطر! بس يفطر الواحد شو بده ياكل [تضحك]؟ بس قد ما يكون جوعان. بقى كثير حلوة أيام رمضان ولياليها-- وهيدي كله يا قلبي كان طبيعي--

ن.ر.: [00:51:32] كانوا يساعدوا الجيران بعضن؟ وقت رمضان، إذا في حدا فقير؟
س.ع.أ.: [00:51:42] وقت رمضان-- يعني في شغلة إنه بعرف من الوالدة الله يرحمها، كل يوم بس يخلص الأكل يعني مساءً تكون محضرة لمثلاً بيتين ثلاثة بحّي يعني وضعن وضعن شوي يعني-- ما بدنا نسميهن فقرا، يعني بحاجة لمساعدة. ومهم كتير لبيعلم برمضان خير ولييطعمي المحتاج. عشان هيكي تلبس تعطينا من الأكل ونروح نوصلن. وفي مرا كمان بحّي كان عليّ أنا أخذها. هيكي، نبقي نسميها شريفة. يعني دينة وهيدا. لمرة، هايب ضلي أذكرها، مرة لحقني كلب وانكبوا الأغراض وحلفت صرنا مما نبقي للعصر. صرنا يعني قبل الظهر شو مهيتين ناخذ، أو حدا يروح معنا [تضحك]. يبقى ذكريات حلوة يا عمّي. كان في تعاون، كان في هيكي يشعر مع المحتاج وبدون بدون ما يتداغر [يتباهى] أو "أنا عم عطفي فلان، أو أنا عم ببيت أكل لفلان". وبالمخفي. وقد ما يعملوا هيكي بستريّة قد ما إنه قال يكسبوا الاجر. إيه-- بقى كثير كانت حياة حلوة ومريحة وما في أي تعقيدات وأي أو شي.

ن.ر.: [00:53:56] بتتذكري كيف كانوا الاعراس؟ كانوا يعملوا اعراس من زمان؟ بتتذكري كيف كانوا؟
س.ع.أ.: [00:54:02] اعراس، أيي. مثلاً بتذكر وقت يكون في عرس، أكيد في ست هيكي موظفة اسمها "الناقشة". هاي وقت بيكون في عرس، يبيعنوا وراها لتهيئ العروس. لتهيئها. نحنا هون بيقولوا "ماكياج"، هيّي لتهيئها شكلها وشو التياب لرح تلبس وشو كذا. وحافطة الزغاريط وبتكون موجودة بالعرس تعمل جو يعني. إيه، ويعني كانوا النسوان لوحدهم والرجال لوحدهم وبعدين ليجي الشيخ وبده ياخذ الوكالة. إيه، الكل هيكي يكونوا محجيين يعني لابسين عراسن والناقشة هيّي تتولى ترد عالشيخ. يعني ما بدن إنه من أول مرة إنه تقلّه "أنت وكيلي". يعني كل ما تأخرت قال يعني قيمة [تضحك باستهزاء]. قيمة لإلها أكثر. إيه. "راحت عالعين" إذا من برأت الضيقة، وإذا بالوسط إنه نبطاني "راحت عالمدسة". لحتى يقول إنه [غير واضح] ثلاث مرات أو شي لتوكل [تضحك]. إيه، بقى يعني حياة حياة سهلة، حياة يعني رغم مرات ما بيستننّي الأمر من وقيّات أو من يعني يكون في حزن أو في هيدا. إيه. يمرق. شي طبيعي. إيه بس يعني كان كثير هيكي حياة رغم رغم رغم العذارى مثل ما بيقولوا، بس كان هيكي مبسوطين العالم بالوضع. ما إيه، ما كلنا مثل بعضنا. وماشي الحال. إيه.

ن.ر.: [00:56:26] كانوا يضلوا الرجال مفصولين عن النساء ولا بيرجعوا بيعملوا دبكة وحلقة وهيكي؟ بالعرس، وقت الاعراس؟
س.ع.أ.: [00:56:34] اعراس لأ. نسوان لوحدهم والرجال لوحدهم
ن.ر.: [00:56:39] مم بالنبطية هاي، يمكن بالضيقة غير بيكون؟

س.ع.أ: [01:06:03] هادي عام 44. واتقدم وقتها سبع بنات، نجح ثلاثة. من جملتن إختي. وفريحة الحاج علي، الله يرحمها. لصارت بعدين مديرة. إيه، ووحدة كمان رفيقة لإلهن. ما تأخرت كثير المديرة الجديدة، كانت خلصت فريحة الحاج علي ببيروت وكمان البريفيه ودار المعلمين، إجت واستلمت محلها لأنه هياي اتجوزت وسافرت. واستلمت فريحة الحاج علي المدرسة الرسمية. تاريخ كتبير حلو لفريحة الحاج علي الله يرحمها.

ن.ر.: الله يرحمها

س.ع.أ: [01:06:59] هاي هاي لوحدها يمكن بعدها محاضرة. المدرسة الرسمية الحكومية هيدي لوحدها بعدها محاضرة. كانت مدرسة الحكومة، يعني كمان وقت لعلنا فيها، هياي الرائدة ثقافيًا ووطنيًا وتربويًا. كانت الأناشيد الوطنية تصدح بكل المدارس، هاو الحكومية المدارس الرسمية. المناسبات الوطنية. كل مناسبة وإلها نشيد. مناسبة عيد الشجرة، نكون محفظين البنات عاملين هيكي مجموعة من الكورال. إيه، يزرعوا شجرة. إمّا يتعاونوا المدارس كلها بمحل معين أو كل مدرسة تزرع شجرة بمدرستها ويغنّوا نشيد الشجرة. بعيد الاستقلال، نشيد الاستقلال. بعيد الطفل، هيدي بعدين عايم الجمعية عيد الطفل كمان في إله. بكل الأعياد كان أناشيد وطنية. للأسف، بعد يعني كل ليتذكرة لمن بلشت بالتعليم مثلاً، أواخر ال 52، مع بداية ال 53، لعام ال 75. ال 75، وقت الحرب الاهلية بلشت، هون اتغيرت الأمور كلها بكل لبنان وإلي زاد المصائب أكثر الحرب الإسرائيلية. العدو الإسرائيلي. والغارات والقصف والخراب، والتهجير، يعني شي ربع قرن. مأساة كلها. حرب وكلها ويلات وكلها خراب وتهجير. بقي بالتمانيات لما انسحب العدو الإسرائيلي عالقري الامامية، رجعوا الأهالي بس شو رجعت المدرسة؟ نفوت طلاب مش الطلاب لمنعرفن. قاعدين برعب لأن ما بعد إسرائيل، العدو بعده موجود. ناظرين جدار صوت. أو ناظرين قصف يسمعون قصف. وبطبعي إني بس فوت على الصف، أول مرة بعد ما إجو، بحب اسمع الأصوات لأن محتاجين. إيه بقي يلا كل واحد، هيدي سنة رابعة كانت. إيه هلق كل واحد به يقل غناية. لأن كان في أغاني الضيعة ولا أجمل من هيك. والأناشيد الوطنية. هاو لكننا منعرفن. تفاجئت. ييه! قام واحد "صيدلي يا صيدلي"، والثاني "يا إمي طلي من الطاقة". شو هيه؟ أول شغلة، كتبت النشيد الوطني لأنه شو؟ سنة حرب وكلنا كانوا. وبين النشيد الوطني؟ بلشت أغاني الضيعة هيك لينبسطوا فيها أغاني الضيعة حلوة. إيه بقي، هيدي كمان محطة.

ن.ر.: [01:10:57] كنتي تحيي تكوني معلمة؟ يعني كان طموحك تكوني معلمة من لمن كنتي صغيرة، أو كان عندك شي طموح تاني؟

س.ع.أ: [01:11:02] من أنا وصغيرة. من أنا وصغيرة، إبقى فلد المعلمة بالبيت، كيف بتعمل. وبالمدرسة، بتذكر كان سنة السيرتيفيكا. كانت شهادتي ومسؤولية كبيرة بس اتعودت قبل السيرتيفيكا على سنوات إنه الساعة عشرة بدّي أصغر ولاد، يعني كانوا سنة أولى، هول يبقوا ناظريني. ننزل عالفرة حاملة عروسة اللبنة بإيد وبعدين كلن وراي، "قديش الساعة يا ديب؟" وقلن وحدة، سبعة، المهم بس توصل للعشرة بدّي أركض وألقطن، ليبقي للأخر هوّي البطل. وما عم بنتبه إنه الرئيسة عم بتراقبني. بتفاجئ بتبعن وراي من الصف. بتقلي "بتحبي إنتي الولاد؟". بقلها "كتبيير". "بتحبي تعلميهن؟". بقلها "يا ريت!". قالتلي "كل يوم فيكي تعطيهن ساعة فنون، لأن شفتك عم بتلعبيهن ومبسوطين. يعني أغاني--". قللتها "أكيد! يعرف أغاني للولاد وأشغال. وبعدين، رياضة وموسيقى ورسم وشغلات". قللتها "أكيد". قالتلي "بعفيكي من القسط". كيقت! والقسط كان بسيط وقتها يعني مش هل-- إنه أكيد بسيط بالنسبة لهل إيام. بقي أنا رحمت ماخديتها بشارة للوالد الله يرحمه "السنة رح وفر عليك. ما رح تدفع القسط". "خير انشاء الله؟". قللتها "قالتلي مس ويلسون إنتي كل يوم أعطي الصغار ساعة فنون وبتعفيني". قلتي "شكرًا، ما بدّي توفري عليي. السنة شهادتك وهاي موضوع ممنوع". وأنا شو كان سلاحي؟ البكا. صرت ابكي ولجأت للوالدة الله يرحمها "الله يخليكن! جربوني. جربوني شهر، إذا تأخرت بالعلامات، إذا هيدا— الله يخليكي والله!". اتدخلت الوالدة. قال "طيب. منجرب". شو! صرت بالليل وبالنهاري ادرس لحتى العلامات للأهل، لحتى النجاح للأهل، وكانت أجمل سنة رغم إنه في عندي مسؤولية. شو سيرتيفيكا؟ شو سيرتيفيكا؟ الإنشاء العربي صفحة وصفحتين، بدون أغلاط إملانية. اللغة الفرنسية إملاء فرنسي، كمان صفحة، مع الأسئلة بالفرنسي. وعلماً مدرسة أميركان، يعني عم ناخذ إنكليزي، بس لأنه كانت مطلوبة بالسيرتيفيكا سنتها، مطلوب باللغة الفرنسية. لبعدين، بأواخر يمكن الأربينات، إيه صار [a choisir]. يعني، اختياري. أو إنكليزي أو فرنسي. بقي الحمد لله وقتها نجحت بالجهتين، نجحت معلمة لهل ولاد وكيقت أنا وإياهن، وكمان بالسيرتيفيكا نجحت. إيه. كتبير كنت حب علم.

ن.ر.: كنتي تشوفي البنات لما بيروحووا عالمدرسة، آلي بيشكوا قتلتي دخان وهيكي إشي؟
س.ع.أ: بالنسبة—

ن.ر.: كنتي تروحي ع"ميفدون"، عضيمة خالك أو هيكي؟

س.ع.أ: بالنسبة إنو؟

ن.ر.: كنتي تروحي عضيمة خالك أو هيكي؟ وتشوفي البنات لعم بيشتغلوا بالتبغ، فتيات التبغ؟

س.ع.أ: [01:15:09] هيدي كتبير كثير مهمة. في خوالي، بالضيعة، اسمها ميفدون، عندن رزق وأكيد كلن كانوا يزرعوا دخان. بقي بالفرة، ما بالصيفية شكّ الدخان، روح عميفدون وأقعد معاهن وأستأنس، يعطوني— اسمه "مبيير" يمكن، وشوف كيف بيشكوا الدخان. بس سألتن "طيب بالشتا ما بتروحووا عالمدرسة؟". قال "أيا مدرسة؟ ما عنّا كمان تسفيط ومدرري

شو". "بيه! [تشهق]" شو رح أعمل؟ مين بدّوا يقوم بهالشغل؟ شو هالحكي؟" قال "إيه. وشو يعني ما فش مدرسة؟". وإذا في، ببستأجروا أوضتين الولاد عبعضها. إيههه ونحنا هيّانا في دخان. مين بده--؟". يعني كانوا راضيين إنه هيدا واقعهين. هيدي كنيير ضايقتني. بقى شوي شوي، صاروا مثلاً البعض، البعض، لعم بيروحوا مع إخوتهم، إخوتهم يعلّمون. أو إذا المدرسة قريبة إلن يساعدهن يعني. ما، يعني كانت خطوة بالأول كثير صعبة إنه في عندن شغل كثير! عندن دخان وعندن الزراعة وعندن مسؤوليات. يعني هيدا خلقت البنات هيك، هيك واقعهها وهيك تتجوّز وتجيّب ولاد وتحافظ عبيتها وع أولادها وكمان تساعد زوجها. يعني كانوا خاصّة بالضيع. كانت عنجد المرا إلها دور والصبايا إلن دور، يعني هيكاي إيدن وإيدن بيهن وخيّن وغيره. إيه بقى بعدين الحمد لله يعني أكثر شي بالخمسينات وقت لبشلت بالتعليم شفت إنه عم يجي من الضيعة. عم بيجوا على النبطية البنات لأن ما عندن بالضيعة صف ابتدائي معيّن، بضطروا بيجوا عالنبطية. إمّا يكونوا مع إخوتهم أو إذا قريبة يروحوا مشي. إن كان صبيان أو بنات. يروحوا مشي. وانطلقوا، وشوي شوي ما شاء الله سبقوا الشباب ومثل ما عم من شوف، النسبة-- نسبة البنات يعني المتعلمات، إن كان قضاة وطبيبات وغيرها. إيه لأ وانطلقوا ويعني مش بس انطلقوا، انطلقوا. وعطوا نتيجة وتقريباً كانوا يتفوقوا على الصبيان وعلى-- والحمد لله.

ن.ر.: [01:18:45] بس خلصتي السيرتيفيكا وين كملت رجعتي؟

س.ع.أ.: [01:18:49] بس خلصت السيرتيفيكا، مثل أي رجيل رفقاتي. يعين ببيعتوها لعند الخياطة تتعلم قطبتين خياطة لحتي لما يجي ابن الحلال، تكون ما في-- إنو وين بدأ تروح؟ في ضهرة برّات النبطية؟ ولوين؟ وإذا برّات النبطية، وين في مواصلات؟ أبدأ! أخذت السيرتيفيكا، هيدي نعمة. يلا بتتعلّم قطبتين خياطة وصارت بتعرف يعني تقرا ووهيك تجيب قصص وغيره. إيه-- بس بعدين أكيد اتغيرت.

ن.ر.: [01:19:40] أههه وانتي شو عملتي؟ كملت بعد السيرتيفيكا أو--؟

س.ع.أ.: [01:19:43] إيه-- هلق خلصتها للسيرتيفيكا. إختي الكبيرة هاي هيّي، هيّي بمساعيها الخاصّة قدرت بس خلصت السيرتيفيكا اتصلت بمدرسة ببيروت، مدرسة الإنكليز كانت، بعرفش هلق صارت الجامعة أو غيره. مدرسة الإنكليز للبنات. اتصلت وبعنت رسالة بالإنكليزي إنه حابّة كفي بس وضعنا المادي ما ببسملنا.

ن.ر.: [01:20:23] كانت تعرف تكتب بالإنكليزي؟

س.ع.أ.: [01:20:25] إيه. أكيد بتكون بمساعدة حدا، هلق هيّي بتعرف إنكليزي بس لمن-- إيه. بعنت إنه بحب كفي علمي بمساعدة. دغري! اتصلوا وبعنولها إنه فيكي تلتحقي بالمدرسة. كيفت. كفت يعني [high-school] وخلصت وإجت دغري واتعيّنت يعني صارت كمان للوالد دعم لأنه التجارة صارت لورا و-- إيه، معناها دغري إجت واستلمت التعليم. كمان مش لفترة طويلة، أبو يمكن خمس ست سنين واتزوّجت. بهل فترة، هلق أنا خلصت السيرتيفيكا. إختي الكبيرة قلتك كان بعد بلّشت. إختي بعد لأكبر مني، معاناتها أنا الثالثة، الوسط إجاها نصيب واتزوّجت بعد السيرتيفيكا. هلق أنا خلصت السيرتيفيكا، احتاروا الأهل. بحبوا إنهم بحبوا العلم. وين بدأ تكفي؟ صعب. ما في. سيرتيفيكا ما في. راحت سنة، وكثار قالوا بتعمل وكلية معلمة بشي-- بشي مدرسة خاصّة. وهون بدّي ركّز ع إسم وكلية معلمة أو وكيل معلم. بالفعل، اتعيّن وكلاء كثيرة من حملة السيرتيفيكا. وكانوا نخبة من الأساتذة. كانوا باستطاعتهم يعلّموا المرحل الابتدائية كلها. هيدا لبينجح بشهادة السيرتيفيكا. معناها كان وكيل معلم لأنه مش قادر يكفي، ما قبلوا الأهل. قام مدرسة خاصة، مدرسة تابعة للمقاصد، فتحوا مدرسة، وصف بعد السيرتيفيكا. كان صف شو بعد السيرتيفيكا، إجت كل المواد بالعربي. يعني مثل بسوريا. الهندسة والجبر والفيزيا والكيميا والطبيعيات. شو بالعربي! ومعلمات مش مهينين. راحت سنة كمان هيك. وضلّوا يفتشوا الأهل. لبعديين عرفوا إنه ب جديدة مرجعيون، مدرسة الراهبات، القليبين الأقدسين، فتحت عندها بريفيه. دغري! استهونوها الأهل إنه وقت لبتروح داخلي عند الراهبات إنه بيطمّنوا إنه ما رح تروح لمحلّ، ما رح-- يعني في كان نظرة معينة إنه بعدين قريبة لبلاط إذا احتاجت شي-- ورحنا عمرجعيون. كانت اتصوري أول سنة طالبة وحدة بدها تقدّم على البريفيه. وتاني سنة، طالبة وحدة بدها تقدّم على البريفيه. تالت سنة، دورنا كنا شي سبعة-ثمانة، وكان بريفيه فرنسية وعربية يعني يقدموا. إيه، بقى الحمد لله، كفيّت وبأخر ال 52 يعني، بصيف ال 52 نجحنا بالبريفيه، وهاي بتخولني ألتحق بالمدرسة الرسمية. رئيسة مدرسة الإميركان، مس ولسون، كانت بعدها. عرفت إنه خلصت، بعنت ورايبي. كان بعدني مش جايني ال-- ال يعني التحق، إلتحاق إني علم. هيدا يعني تشرين أول. وتشرين تاني وبعنتلي خبر إنه شو رأيك تبقي؟ لأن انا بحبّ علم واستلمت دغري أول تكميلي. إيه، شو لقت إنه الصبايا مبسوطين. شو رأيك تعلمي ومنعطكي مثل الحكومي؟ ما حدا بيقبل، يعني الأهل بيضلّوا يفكرّوا للمستقبل وليعيد. كان إجابي الإلتحاق. بقى شو كان، بكانون بأول ال 52، يعني مع بداية ال 53 بدأت رحلتي بالتعليم واستقبلتني مديرة. مديرة نموذج. نموذج ب ب شو-- غير ثقافة، غير الاخلاق، غير التربية، غير التفاني. سلّمنتي صف السيرتيفيكا. قانتلي استلمي، ما عدا الحساب، هيّي عم تعطيه كان. كانت عم تعطي حساب. وكانت بنفس الوقت مثل الناظرة بالفرصة لأنه ما كان في هيكي معلمات مثل للناظرة. أنجق كل معلمة صف. إيه. للناظرة، للحاجب شو عم بيعمل، لبدها تعطي درس. كانت متعددة النشاطات. وخلقت من المدرسة عنجد يعني لمن بك تحكي عن نموذج لمديرة، هيدي لوحدها بدها ساعات.

ن.ر.: [01:26:27] لهيّي فريحة؟

س.ع.أ.: [01:26:29] فريحة الحاج علي. عملت من المدرسة الابتدائية تكميلية. استعانت بأساتذة، ما في معلمات يعطوا التكميلي. استعانت بأساتذة. وبعدين صار بناء جديد كمان استلمته. بعدين غير يعني التقيت أنا وإياها بأمر كثيرة، مثلاً النشاطات اللاصيفية، فرقة كشاف للولاد، الأناشيد هاو كانوا، بعدين مسرحيات صغيرة. هاي كانت مسؤوليتي. بعدين كمان مسؤوليتي السيرتيفيكا. يعني ما كان في عندي فرصة جمعة وأحد لأن في تنافس بين المدارس، أياً مدرسة بدأ تكون الأولى وينجحوا كل طلابها. من هون استاذ السيرتيفيكا او معلّمة السيرتيفيكا كان ما في ولا أياً عطلة ولا فرصة، لا الفرصة الأسبوعية ولا العطل الرسمية. وأحياناً جيبين عاليين، يعني قبل ما اتزوج، جيبين عاليين وحتّى بس اتزوجت كمان جيبين بعد الظهر لنتابع، ومرات لهيكي ينسطوا وخفف عن نروح عالبريّة نهار وياخدوا أكل ولحتّى نكفي البرنامج. بقي الحمد الله والكلّ نجحوا. وغير هول عيني كان كنت لاقى فرص غير التعليم للصبايا. يعني في درس الأشغال لقال بطلوه بالسيرتيفيكا، أشغال، هيدي درس الأشغال مقدّس. رياضة. لو كانوا بالسيرتيفيكا، ساعة رياضة بدّن يعملوا رياضة. موسيقى، ساعة الموسيقى. بقي وقت ليكون شتاء وما في رياضة، لاقياها فرصة، دبّر منزل، علمن كيف يعملوا جاتو، هيكي بالبيت. أو أعطيهن دروس هيّي حول تدبير المنزل إنه هول بدّن يظهروا من السيرتيفيكا يمكن ما يقدروا يكفوا. بدّن يظهروا إمّ واعية وكمان مثقفة، غير الدروس، بتعرف إن كان بعض الأكلات أو بعض إرشادات. هيدي أيمتي كمان؟ بساعة الرياضة وبساعة الأشغال. علمن الغرزة، القطبة المطلوبة، يقعدوا يشتغلوا. هلّق وهني عم يشتغلوا نفتح مواضيع، يفتحوا قلبن وياما لاقى في مشاكل عند البعض، أخدها بعدين عجنب، لأن كانت بعد ظروف الحرب كانت كثير البنات والصبيان طلعتن صعبة بعد الحرب. الإمّ ما إليها خلق من لمن بعدو في قصف، ما إليها خلق تسمع لهل بنت شو عندها. البّي كمان لإبنه يسمعه. كانوا الكل هاجز القصف، هاجز الحرب. عشان هيكي بقى لقيتها فرصة يعني كان بالخمسينات تقريباً هيئة وجّهن. إيه، تدبّر منزل أو شو بدّن هني عندن مشاكل. هيدي كانت مهمّ كثير، يعني تظهروا. بنت السيرتيفيكا مهياً تكون [صوت شخص يتكلم في الغرفة] بنت ناجحة وستّ ناجحة. هاي بالنسبة ل-- هيدي 15 سنة سيرتيفيكا، أخذت صف السيرتيفيكا. بعدن الدولة عملت دورة للأساتذة للمعلّمت يلي من حملة البريفيه لحتّى يعلموهن على طرق نموذجية جديدة. بقي مضطرين نروح نعمل دورة كل رعيلا. عملنا دورة والحمد لله لأن كنت يعني أهل إنن اخدوني على النموذجية دغري، هيدي المدرسة تابعة لدار المعلمين لإعطاء هل الدروس لأخذناها، طرق جديدة. طرق نموذجية جديدة، وبالفعل انتقلت على المدرسة النموذجية وكمان شي 15 سنة. ولبعدين صار حرب وكمان هون في محطات كثير حلوة بالنموذجية.

ن.ر.: بدّي ارجع شوي لوقت كنتي بالمدرسة الداخلي كنتي عم تعلمي البريفيه.

س.ع.أ.: إيه.

ن.ر.: شو بتتذكّري؟ بتتذكّري يوم من أيام الداخلي مثلاً؟ شو كنتوا تعملوا؟ كنتي تروحي عالنبطية مثلاً بنهاية الأسبوع؟
س.ع.أ.: [01:31:12] مرات بالشتاء لأ. وكنت نصّ داخلي، بمعنى إنّي نام بالدير مع الراهبات. ما كان في داخلي حدا غيري أنا بس. ما في [تضحك]، ما في، ما في غير أنا! مع الراهبات حاطينلي تخت وهني أكيد مسرّر محل ما بيناموا، إيه بقى. وقت الشتاء ما إرجع عالنبطية. وقت طقس معقولي، إجي سبت وأحد. بس كنت نص داخلي، بمعنى نام عند الراهبات بس بالجمعة تيجيني السلّة مرتين، بيعتوها مع الشوفير، سلّة فيها أكل-- فيها أكل، وشو عاملين يا حرام فاكهة وغيرها بيعتوها عند إنسان بيعتلي إيّاها عالدير. سلّتين يكفوني. بس [تضحك] صارت حادثة قد ما كنت كثير مضغوطة، لأن يعني شي، مهما كان كنت فرنسي، ما كنت مدرسة أميركان، بس لأن القواعد واللغة حافظيتها منيح، هاي ساعدتني. بس بيبقى قصدي كثير ال[pratique] الحكى، بعدين التاريخ التاريخ بالفرنسي، الجغرافيا بالفرنسي. يعني بأول سنة [Algérie] مش عارفة إنه الجزائر. اسمها [Algérie] أو [تضحك] لأن هيكي شغلات كلّه بدّي دور بالقاموس وترجم. بقى ما يصحليّني إني أعمل إنّي إقلي ببضة. الأكل لبيعتولي إيّاها حافظ عليهن أكلهن. في مرّة عم قلها للوالدة الله يرحمها بقلها مرّات، مرّات يفتح الكبة انا وعم بفتحها بصير هيكي بشوف خيوط "بييه!"، شهقت. "بييه!"، يا مسعدة يا بنتي بيكونوا محنّنين بيكونوا محنّنين! يعني عم باكل ومش فارقة لفتولي إنه هيكي لأن ما في وقت. ما في وقت. إنه أخذ شغلات هيكي فيني استعين فيهن لبنة أو مربّي أو شي أو هيكي إيه. هيدي كانت عند الراهبات وعند الراهبات كمان كان إلي دور لأن وقت لفت إنه لغتي العربية غير، عند الراهبات كانوا بشكل عامّ يهتموا أكثر شي باللغة الفرنسية. لقوا الإنشاء لعم بعملها غير، الحفظ، القراءة، كلّه. صار مين ما إجا مطران أو كذا بدّوا أعملوا كلمة وأنا استقبله. شوي شوي كمان ما أنا كمان عايشة معن دخلت بالكورال بالأناشيد كلها لعيد الميلاد. لاحظوا إنه اللهم لك الحمد إنه صوتي حلو. كمان استعلّوا هالشّي بمناسباتن وكل سنة بآخر السنة في حفلة اكيد يسلموني بطة الروادة يعني. إيه بقى هيدي شغلا كانت بدمي، هيدي كثير ساعدتني بالتعليم وبالجمعيّة--

هيي كانت سنة وحدة ما هيكي؟

ن.ر.:

س.ع.أ.: [01:36:16]

ن.ر.: [01:36:22] كان بدّي اسالك، قلتلي إنو وضع المدرسة الرسمية وقت لكنتي تعلّمي السيرتيفيكا الوضع كان منيح كان مستتبّ يعني؟ غنه كانوا الطلاب يتجاوبوا معي أكثر، كنتي تحسّي في--؟

س.ع.أ.: [01:36:41] إيه كانوا كثير لكل كلمة لأن وقت الدرس تكون المعلمة لبتحاسب، لبتعطي إذا وحدة عاملة منيح بتشجّعها، إذا وحدة مقصّرة بدا تحاسبها. أمّا وقت الأشغال ياخدوا راحتن. صرت يعني موجّهة. مرشدة. كنت دوري كثير

مهم وأنا أنبسط لأن لاقى حالات عمّ عمّ عمّ بفيدها. إلى جانب الدرس، عم يستفيدوا بأمور للمستقبل لإلن، إيه بقى كانوا كثير مبسوطين.

ن.ر.: [01:37:27] شو كنتوا تعملوا نشاطات قتلتي؟

س.ع.أ.: [01:37:30] نشاطات-- كنا نشترك بكلّ الحفلات الوطنية وأكثر النشاطات يآي كانت كمان على مستوى أوسع وأكبر وقت الجمعية. هون صار غير. وقت المدرسة في الحفلات الرسمية، في الأناشيد، في ال هيكي يعني روح الوطنية. إيه، غير. يعني هلق مع الأسف، مع الأسف، هلق يمكن يمكن-- شو بدّي قول-- لبالحكم بزات الحكم، لخالصين علومن لكذا تعي قليلان النشيد الوطني. ما عم منشوف مرّات عالتيلفزيون بيتلّكوا. إيه لأ كثير كثير كثير اتغيّرت، كثير كثير اتغيّرت.

ن.ر.: [01:38:38] كيف اتعرفتي على زوجك؟

س.ع.أ.: [01:38:40] نعم، هلق-- كيف مثلاً-- ما كان إنه في، هيكي تتعرفي من خلال معرفتك بالأساتذة أو غيرها، لأ. كنا نروح على المدرسة. إيه، ويمكن نحنا أنا وإختي بالأول، ما كان بعدها عم بتعلم، نلتقي هيكي بأشخاص مارقين. ل بال 56 أظنّ إيه ببيجي-- ما بتعرفي أشخاص أصحابنا إيه، بيعرفوا هالشباب خيين كثير-- هني أساتذة وأخلاقياتن وغيرها. بقى الكبير مش وارد عنده، لأصغر زوجي [تخفت صوتها]. قال عم بيقول محل ما كانوا مستأجرين بالنبطية إنه والله حابب اتعرف على هيكي بنت وأخ والله لنشوف ونجسّ النبض. في فلانة، إيه وبالفعل إجوا إيه خالي الله يرحمه كان طبيب، بس كان مسؤول حزب البعث يعني كل هالشباب المثقفين كلن يجيوا لعنده، يعني بيعرفن. بقى أهدن قلّه أنا أنا رح ذلك. بيطرحوا الموضوع عالاهل، الأهل بيلقوا كثير مناسب الموضوع. ان كان الشب وضعه العائلي، يعني بتعرفي أبوه مرجع، مرجع، إنه عالم دين ببلدة الدوير. إيه وبقى كلن متقّين وأكيد وقت تربية عالم بتترك أثر على الولاد أخلاقياً وهدياً. إيه، الأهل ارتاحوا كثير للموضوع واتعرفنا وكان موضوع قابل إبيه بس أكيد خطبة ويروح ويجي وهديا كمان، يعني هيدي مش مستحبة، إنه حرام وهديا. قام عملنا كتب كتاب، اتصوري مثل خطبة يعني، بيصفي بيحي يقعد وكمان نتعرف أكثر على بعض. إيه-- هاي سنة 56 57 والحمد لله، كان زواج الحمد لله موفق. تابعنا تعليم مع بعض.

ن.ر.: [01:42:18] هوي كان يعلم؟

س.ع.أ.: [01:42:19] إيه، هوي أستاذ كان أستاذ بالمدرسة الابتدائية وهيكي. تابع بالجامعة عمل اختصاص جغرافيا ودغري اتعين بدار المعلمين. إيه بقى كمان بدار المعلمين اتوقفنا كناً متزوجن، يعني أنا بالنموذجية هوي بدار المعلمين ما، مدخل واحد. يعني بناء تنين، مبنى للمدرسة النموذجية والمبنى لدار المعلمين. يعني نروح سوا ونيجي سوا. إيه هيدي وقت كناً إيه بس أكيد وقت بالبداية لمن معلمة ويتأخذ كمان أستاذ أو آيا شخص موظف وهيكي تكون موظفة يعني في مسؤوليات جديدة وفي حياة جديدة وفي طريق صعبة لأن بدول محض--بتحترم نفسها وقت لموظفة بتكون بيكونوا مهينينها لولادها دور حضانة نط بتروح عشلها مرتاحة وما بهمها. بينما كانت حياة صعبة لأن بذك توقي بين البيت والمدرسة. مشي الحال، بس لما ببيجي الولد، هون صارت الصعوبة. وين بذك تتركي الولد؟ إذا الوحدة أهلها حذا، بتتحل نصّ المشكلة. بس لمن اهلي بيبيروت نقلوا عبيروت وأنا هون، هون المشكلة أكبر. وبلشنا نعاني من العاملات لبدن يشتغلوا وشو شو ببيجوا كيف يعني

ن.ر.: [01:44:41] العاملات من الحي ولا من غير مناطق كانوا؟ من غير مناطق كانوا؟

س.ع.أ.: [00:34:03] إيه كانت صعبة بس كان عندي شرط رئيسي إنه ممنوع، ممنوع تشتغل شي إلا تصلّ تنتبه للولد لإجي. وما تتصوري هلق البيت هلق لقاعدة فيه هيدا بيكون تاسع بيت ناقيلنه، لأن وظيفتي بحيّ البياض وصرت كلّ ما خلص فضي بيت انقل أغراض إنه أقرب صار أقرب أقرب، لوصلت إنه قبل هيدا البيت كنت اسمع الجرس. يعني تمانة إلا خمسة لروج عالمدرسة. عالساعة عشرة إجي طلّ عالولد. بعود برجع عالمدرسة. عالساعة 12 برجع عالبيت. بعدين كان في كمان ساعتين بعد الظهر. كان ثلاثين ساعة الدوام. يعني ستّ ساعات بالأسبوع. بقى عشرين هيك دور، نقلت بيوت هون بس بحيّ البياض، شي خمس ستّ بيوت قبل ما نوصل هون، أي أقرب أقرب لهيدا البيت لأكثر فترة قعدنا فيه، مش لقاعدة فيه أنا يعني قريب للمدرسة كثير بشكل إنّي ضلني رايحة جاية وعانينا وقت تترك البنات، ما تعرفي. استعنا بالفلسطينيي وقت لكانوا هون. إيه هول يعني سدوا الحاجة، بس كيف ما نحس إلا تترك، بدون ما تقول إنه بيت فلانة زادولها أو شي. تعي دوري عوحدة. في مرّة عنمنطقة بنت جيبل رح، منطقة بنت جيبل، لحتّى جبت وحدة، أو مدري من آيا ضيعة وعنجد عنجد رعلنا عاني عاني أكثر من هلق. من هون قديش عملت مثلاً اللهم لك الحمد بقدرة الله، إنجازات قديش تمّ إنجازات بس بفتخر وضميري مرتاح وقت بالثمانينات فتحت أول حضانة، لمن رجعوا المهجرين وما فش هلق فلسطينيي ما راح المخيم بالقصف وبدن يروحوا عالمدارس ودخيلك! بدّ، يروحوا عالمجمعيّة دخيلك بذك تفتحي حضانة! أكيدة تعاونت مع الأهل لأنه مادياً شو الجمعية بعدها ما وفقت عاجريها وهون قديش انبسط وقت المعلمة تجيب الولد أربعين يوم، ويعني اتعمد جيب إم مش إنه من حملة علم إجتماع أو علم أدب الطفل وصبية تكونش مجوزة لأن كتار دور حضانة فشلت. جيب إم. الإم لو الولد وسخ أو شي أبداً تتضابق. بقى عطول، من الأربعين يوم استقبلنا ولاد من ال 83 لغاية هالساعة لقاعدة معك، بعدها الحضانة ماشية وكنزوا دور الحضانة هلق. كانت هيدي الحضانة الوحيدة بمحافظة النبطية. إيه، وغير قبلها كناً عندنا الروضة. بقى هيدا إنجاز كثير هيكي انبسطت لأن قد ما مرق علينا. لأن مرّات تكون ماخذة ابني بذاها تضهره شوي يتعب بده إنه تحمله

يصير بيكي. قَلَى الجيران، مرّة قالولي "يا إم أكرم! ما عش تبعتي إبنك معاها! شوفي عضته!". جيت لقيتها عاضته، لأن شافوها عن البرندا عم بيكي لتحملة. عضته وحملته. وغير مرة كمان شغلة صار حوادث كثيرة. إيه بقى رعلينا عنجد عنجد عاني. ثلاثين ساعة بالأسبوع بعدين ما في دور حضانة إذا في اهل بتتحلّ نصّ المشكلة. بس إذا فش أهل، وبين على هل الأمية لعم بتحبييها؟ كيف تتصرف كيف؟ إيه هيدي كتير عانيت منها. الحمد لله.

ن.ر.: [01:50:14] ما كانا يضغظوا عليكى مثلاً أهلك أو اهل زوجك إنه تتركي التعليم لتتفضي لولادك أو شي؟
س.ع.أ.: [01:50:21] ما أهل زوجي بالدوير.

ن.ر.: [01:50:22] قصدي زوجك كان متعاون معك؟

س.ع.أ.: [01:50:26] أكيد. أكيد. أكيد كان إلو دور يا قلبي. وفي هاي حتّى كتبتها بذكرياتي قد ما كان يحبّ يساعدي. إيه بقى في مرة كان في ساعات فراغ عنده، إجا قلبي. جيت أنا دغري عالضهر لقيت هوّي عنده هواية: الجلي. جاية إنه يرجعن لمحلن ويعمل السلطة ويهيأ. أنا دغري ببجي بشيل من البراد لسخن الأكل إيه. بقى في مرّة قَلَى "بتعرفي حلو المرأ تساعد زوجها بشغل البيت". هيدي حكيتها لكل زملاؤه. صار مثل. إيه. لأن مؤمن ما وارد إنه يعني أنفع الإنسان أنفعه لعيله، بمعنى هيك في مثل حلو إنه "أفضلكم عند الله أنفعكم لعيله"، بهل معنى. إيه، هوّي من هالناحية إنه بيشرح معي إنه عم بتعب، الله يرحمه.

ن.ر.: [01:51:56] الله يرحمه. جبتي ثلاث ولاد ما هيك؟ عندك ثلاث ولاد؟

س.ع.أ.: [01:52:02] ثلاث ولاد لأن راح ولدين، راح ولدين بالحمل قضية صحية، دم[negative] وغيرها. ما كان في حلّ هلق صار في حلّ إلهما ما عش مشكلة. بس الحمد لله كتر خير الله

ن.ر.: [01:52:23] كنتي تحبي تصيري إم يعني ولا كنتي مضطرة؟

س.ع.أ.: [01:52:24] لا لا لا كثير. يعني كلّ الوقت عم لعب الولاد وضلّني فكر هلق بس اتزوج يا ربّي يصير عندي ولاد يعني يضلّ عندي هاجس خاف إنه ما يجينيش ولاد. [تضحك] إيه لأ لأ الحمد لله.

ن.ر.: [01:52:43] وقت الحرب، وين كنتوا تروحوا؟ كان في ملاجئ؟

س.ع.أ.: [01:52:46] لا ملاجئ ولا شي. أبداً. رعب. يعني إلي بيخافوا تركوا البلد. نحنا تقريباً ل بأواخر حزيران يعني ما عش في حدا بالبلد غير القلّة، وحيّ البياض كان عطول ياكلها لأنه كان فيها فدائيّ وفلسطينيّ. بدّن يؤذوا الأهالي لحتّى يصير عندن نقمة ضدّ الفلسطينيّ. انصاب البيت عنّا اضطررنا إنه نترك ونتهجر مثل ما بيقولوا على شرق صيدا، على بلد اسمها نبعّة. إيه. نبعّة. إيه. نحنا رحنا إنه هيّا هن إنه الجيش رح يفوت وأبو سنة إن كتر أبو شي خمس سنين بقينا بنبعّة. بس اتفقّت مع الإدارة دغري إلتحقت بمدرسة الرسمية قتلته إذا ممكن بدّي نهار السبت يكون عندي فرصة بدّي روح على النبطية استنفد الأطفال لأن بقيت الروضة تشتغل، مش الحضانة. الحضانة كان بعدنا الحضانة بالسبعينات. الروضة هيدي من الثلاث سنين للخمس سنين روضة مع مصلحة الإنعاش هيدي لأن هول يعني للفقراء لذوي الدخل المحدود ما فيهن يحطّوا ولادن برياض أطفال المدرسة الخاصة. ما فيهن. فتحنا روضة وقتها. وبقي كا في شي بلشنا بأربعين ولد طفل طفلة، صاروا 100 وقت لاتهجرنا. كان في 100 طفل وطفلة. أخذت ببناية بالطابق السفلي إيه إنه بعيدة لأنه ما في ملاجئ قصف وكل سبت إجي مع المديرية الله يوجهها الخير، عادة جابر، هاي هيّ مديرة الروضة. هيّي كمان مهجرة بعبرا. تلفلها ونيجي كل نهار السبت. مرّات نسمع إنه في قصف كثير. في مرّة ما جينا، زمطنا. صار قصف وأصيبت معلمة يعني استشهدت بالقصف بقى هيّي وبالشارع هيّي وبالطريق. بقى كنا نطل وحتى بذكر يوم عيد الطفل ما تركت لأن عطول عندي عيد الطفل وعيد الإمّ هول مقدسين. بقى عيد الطفل في قالولي ب كفرّ جرّة ضيعة قريبة نبعّة ببعملوا سلال. قصدتن "بتعملوا سلال صغيرة؟"، قال منعمل. عملولي 100 سلة صغيرة. وفي إنسان منعرفه عنده سكاكر بونيون وشوكولا وغيره. قتلته بدّي ل 100 سلة بونيون وهول. أعطاني، أكيد ببلاش يعني. عطاني، وجبتلن سلال وأخذوا صورة فيهن. بقى لحتّى صارت بالقري الإمامية بال 83 لرجعنا مع اللي رجعوا وتابعنا شغلنا.

ن.ر.: [01:56:47] كيف إجتك الفكرة إنه تعملوا جمعية؟

س.ع.أ.: [01:56:50] هلق كنا عطول مثل ما حكيت، إنه عطول الله يرحمها المديرية مهياة للنشاطات، وأنا بدميّ الفنون. بقى كنا على طول منعمل حفلات بالمناسبات ويصير عنّا إجتماعات وهديا. لقينا إنه لازم يكون جمعية، لأن عرفنا إنه في جمعية فولانية هيك يمكن بالجنوب. قلنا هات لنقدّم طلب ونعمل جمعية وتصير جمعية ساعتها ببجي عملنا جدّي أكثر وببجي عملنا يعني نشاطاتنا غير. بعنتنا، أكيد أخذت وقت كبير لأن يروح تقارير إنه هول الأعضاء يعني بلّي نحنا باسمنا منعبتنا هول حزبين، هاي بعثيّة وهاي قومية سورية وهاي شيوعية وهاي. ما يعطونا ل 69، بحزيران 69 أنا وبالنموذجية عم بقرا بالجريدة لقيت وزير الداخلية كمال جنبلاط يسمح بإعطاء رخص للجمعيات وللأندية. دغري اتصلت بالله يرحمها فريحة ناصر، هيّي بمدرسة وأنا بمدرسة. انا بالنموذجية، هيّي بالمدرسة الجديدة لعمرها. "يا ستّ فريحة، فُرجت الحمد لله. صار فينا نقدّم طلب". يه! ركضت. هيّي مستعدّة. وراحوا قدّموا طلب، ورحنا مجموعة لعند الوزير على المختارة لحتّى نشكره. "ليش تعذبوا قلبك؟ بيكفيّ تقدّموا طلب. ايه وكل شي، شكراً". بقى يعني مع بداية عام 70 انطلقت الجمعية. وبلشنا بورش العمل. بلشنا باللجان وكان خمس سنين سعادة من ال 70 لل 75 قمنا بأعمال جبارة.

ن.ر: شو الأعمال الي قمتوا فيها؟

س.ع.أ: [01:59:36] نشاطات يا قلبي، إن كان عصعيد فني حفلات، إن كان على صعيد إنساني. إن كان مرّات يبجي قصف على المخيم، نطلّ على المخيم إذا بدن شي. على صعيد المناسبات كلها. وبعدين صرنا نحرص أكثر شي على عيد الطفل وعيد الإيم بأذار، يعني كان شهر آذار للجمعيّة وخاصةً آخر آخر 10 أيام، آخر أسبوع. بقى صار في الفنية للأمر، الحفلات؛ الاجتماعية للأمر مثلاً نبقى نعمل حفلات نظافة، نورّع سلال بالشوارع أو شي. بعدين قمنا بحملات محو أميّة بالمنطقة، إيه ب عبا و عملنا غير دورات خياطة. وبالنبطية كمان كان في دورات محو أمية وبعدين كان في حفلات لكلّ المناسبات، يعني نشاطات منّصلة. إيه. وبهل خمس سنين مرقت 73 دولة، قالت، بأذار هيدي السنة بدكن سنة تكريم الإيم المثالية عن كلّ محافظة. كان دورنا الرئيسي كان قائم مقام موجود، الشيخ حلیم قياض صار بعدين محافظ بصيدا. دغري اتصلت وشفته وصرنا ننسّق وحطني بالصورة إنه هاي مسؤوليتكن. وهون الصعوبة لأن بالنبطية وبالجنوب، بكلّ بيت في أم مثالية. يعني قتلته مرّة "يا محلا وقت لبيختاروا ملكة جمال. هيّنة. بس أم مثالية؟ بكلّ بيت بالنبطية في في مكنة وفي أم عم بتخيّط لتساعد. بكلّ بيت في إم عم بتعجن لحتّي تخبز لحتّي تبيع خبز. بكلّ بيت في وحدة عم تعمل، تقرا تعزية. بكلّ بيت". يعني شو هاي؟ لحتّي اكتشفنا أم بالفعل عندها كلّ المواصفات. أول شي قابلة قانونية، وفتحت أول مستوصف بالنبطية. ثاني شي البيت ما عندها خادمة والولاد هيّ مسؤولّة عنهن الولاد. وتالت شي كانت قابلة عن المنطقة كلها. يعني وعطول الحامل أكثر وقتها بتكون بالليل لوضع الطفل. تضطرّ بدھا تروح العالضبة وكان زوجها مريض. كمان هيدا شرط ثاني. زوجها مريض مقعد يعني ماخذة دور البّي والإيم. واتصوّري دورها كإم قديش صعب. بالبيت وبالبرّا. تروح بالليل على الضيعة. هلّق السيارة بتوصّلها لمحلّ معين يكونوا مهينيلها الدابة لحتّي تكفي لتيجي أول الضو لولادها. يمكن تلاقي من جماعتنا تلاقي حدا يعني تحطّن حدّن أو شي. هاي شغلة. يعني اتصوّري تقوم للولادة بالنبطية وبالمنطقة. بالبيت زوج مريض مع أطفال-- أطفال خمس أطفال يعني كان. وبعدين لمن بدنا نكرّمها كانوا شو صاروا شباب يعني. قدّمت، يعني أعطت للمجتمع أعطت الضابط، هلّق أكيد صار عميد ومتقاعد. قدّمت طبيب، كمان حرام اتوفّي من مدّة. أستاذ جامعي بفرنسا. بنتين خريجات جامعة. يعني أعطت لل أعطت للمجتمع خيرة الشباب والصبايا. وبعدين خدمة، أصعب خدمة. لأن بالليل هيدي بدھا ما فيها إنه "تبقي لبركا معلش يبجي أو تعطيه مسكّن أو--"، أبداً! بدھا تحضر واتصوّري مسيحية. هيّ مسيحية وماخذة مسلم، شعبي من النبطية. اتعرّفت عليه كان محامي بعزّ شبابه يمكن ببغداد مدري وين، وأهلها جماعة ميسورين ومعرّفين. اتزوّجت ووحياتك حفظت صورة مريم بالقرآن. بس تروح تقعد حدّ لعم توضع تقرالها صورة مريم وبعدين عم قلّك شغل صعب! مش وظيفة علّمت إجت عبيتها. بعد هيّنة. بالنهاية عندها المستوصف شوي يبجيها ناس كمان فيها ولادة. أي بذكر ثاني ولد هيّ ولدتني. لأن أول ولد بكرية بمستشفى بيروت. إيه. كانت للنبطية كلها وللمنطقة. رحت شفت القائم مقام لقيته عنده لائحة بالأسماء طلّعها. بيه! يا سعادة القائم مقام هاي زوجها عم يشتغل موظف، وهاي عم بتخيّط وزوجها عم يشتغل. وهاي ميسورة بأفريقيا جوزها عم يبعثها مصاري. وهاي لأ. لفرجيك شو جبت. هوّي شاف هاي، قلّي خلص. بعث اسمها وبعثوا الوسام في إلها صور بعدهن عندي. انا لبستها الوسام وعملناها إحتفال. هيدي بال 73. بال 74، لمن لقيت الولاد لقيت الميسورين عم يجي الأوتوكار وياخذن. وهوليكي لكانوا عم يلعبوا هنّي وإياهن بالصيف بيتطلعوا، مش قادرين. أول شغلة فكّرت لازم نفتح روضة لهول. قصدت مصلحة الإنعاش الاجتماعي وكان مديرها وقتها إنسان من النبطية الشيخ مهدي صادق. رحت وقلّي أكيد فيكي تفتحي روضة. 74 كمان صار عنّا روضة، وبعدين ما تسألني الحفلات لعلناها. حفلات بصيدا وهون. هيدا المسرح العائم بقاعة صيدا. يعني كان التمثيل مسرح بالقاعة. هول كلن. وغير عيد الطفل ونشاطاته. غير الأندية شو عندها نشاطات نتعاون معهن. لإجت الحرب الأهلية البشعة وخلص. من ال 75 وحتى بالثمانينات لو جينا بعده القصف وحتى لل 2000 ع يعني هون بالمنطقة يعني بالنبطية وبالكلّ يعني الفرندا منعرفاش. يعني حياة حياة قرّطة! ومع هيدا وكلّه، زاد علينا صار في عمل مهمّ كثير. عم يبجوا من بيروت وقت الحرب الأهلية عم يبجوا أهالي من بيروت وبالصيف. دغري دبّرنا المدارس. بقى حطيناها بالمدارس وكمان لبده إدوية لبده أكل لبدين تياب لبدين شي. صار عنّا عمل جديد! عمل إغاثي، إغاثي إلى جانب الأعمال البسيطة. إنه للروضة نزلنا عمّ محافظ عليها، وعلى مدارسنا على شغلنا. بس صار في هون عمل جديد. وبذكر مرّة ونحنا بالمدارس عمّ ندور، لقيت في ولاد عم يخلقوا صغار. يعني بيبات. اتصلت، يعني الواحد لازم يعطي الإنسان حقّه. قالولي في عندك مؤسسة الحريري مسؤولة عنها ست بهية الحريري. دغري كتبتلها رسالة وحطيتها بالوضع، بعثت تياب الكبار تراناش-كوتات [trench coats]، وللصغار 100 طقم أزرق إذا صبيان و100 طقم زهر إذا بنات. بقى الحمد لله كان عنجد الجمعيّة بنشاطاتها الإنسانية وأعمالها، علما إنن يا قلبي في كثير من أعضائها مهجرين، يعني يبقى الجمل على تنين ثلاثة وهل عبدة لقبالك، كان الجمل أكثر شي. والحمد لله وبقدرة الله كنا ربنا يعطينا القوة ونتابع.

ن.ر.: [02:10:26] كان عندكن مقرّ للجمعيّة أول شي؟

س.ع.أ.: [02:10:29] شي عشر مراكز غيرنا ما القصف-- لأن كل ما صار قصف بحّي، يكون إلنا الروضة حاطينا هونيك دغري دغري نحملن ونغيز! ما في، وين في مركز، فش شي أبداً. وبعدين مصاري، سيولة منين؟ يعني نصير نعمل نحنا نشاطات، نعمل هيكي حفلة بسيطة لو الكارت بألفين أو غيره. أو نبيع أوراق يانصيب، أو فيلم سينما، نضمن فيلم سينما-- نبيع. يعني شغل هيكي لحتّي نوّمن شي بين إيدنا. هيكي سيولة. إيه بقى بالنسبة - شو كنتي عم تقولي

ن.ر.: وين كان—وين عملتو مقرّ للجمعية

س.ع.أ.: [02:11:21] ايه عشان هييك، بس يصير قصف نعمل هالولاد لمركز يعني أمنن شوي من هيدا. وندور على نطلب من البلدية "دخيلكن بركي بتدبرولنا شي عقار". وهييك، ندبر حالنا. صعب. بدأ مجلس وزراء وبدأ مدري شو. بقينا، ناضلنا كتير لحتى عرفنا إنه عم بهل عقارات لحوالينا المتمكنين عندن أرض عم يفرزوها، وقت لبيفرز الأرض بيطلع حدائق هيدي حدائق عامة. دغري، لأنه عرفنا إحدى الجمعيات أخذت أرض وعمرت فيها بالمنطقة. دغري بلش شغلنا. اتصلنا بالبلدية البلدية توافق لأنه هيدي حديقة عامة يعني بس نعمر في مشروع بعدها تنظيم المدنية. رحنا عند المدير العام عملناه زيارة وأخذتله المشروع "إليك شو بدنا نعمل". من المنطقة بيت فواز، الله يوجهه الخير، محمد فواز هيدا كان المدير العام للتنظيم المدني ببيروت. قلّي "هلق إذا ما مضت بيروح عليك". قلنله "أكيد!". قال "لكان اختاروا حديقة أكبر". قلنله "هاي تسع دونمات، يعني تسع ثلاث متر مربع. هيدي". هيكي كان بهل معنى. يعني إنه شو تسع دونمات، هييه! بحر، إذا بتشوقها بعد في سبع دونمات بدنا نشوف شو بدن يعملوا هلق لاسلموا إذا حديقة إذا شي عملوا ملعب. وهونيك عمّرنا ثلاث طوابق. قلناله بكفينا هيدا. وافق. بس وافق، هلق إجانا عمل جديد. ونضال جديد. وشحادة جديدة. واتصالات جديدة. ووين ما عرفنا في تبرعات نقصد، ووين ما عرفنا يعني في مساعدات. إيه بقي. بالتمانيات، بالتمانيات حصلنا عليها للحديقة وكمان بهيدي بال 87 88 هييك، بلشنا حجر الأساس وبالتسعينات بلش الطابق الأرضي للحضانة والروضة كانوا مع بعض. شنتين كمان صارت 93، عملنا الطابق الأول للروضة. انفصلوا، هلق صار عنّا طابقين، الحضانة والروضة. إيه وكمان طريق ما فاش، أمنا تزفيت الطريق. معمرة على الحجارة. أمنا مين هيكي يساويهن. إيه بترجع بهية الحريري وقتها ساعدتنا بس كان إنه كان في وضع صعب. ونحن كثير كان شغلنا صعب لأن ما فينا نكون مع فريق ضد فريق. نحنا مع الكل. ونفهم هول الولاد ولادكن كلكن. الأطفال لإلكن كلكن. المركز لإلكن كلكن. بس خلونا. هيدي كثير دفعنا غالي يعني. إيه بس الحمد لله الحمد لله. يعني اتصوري القصف قايم، شو لمن مرات يعني اللهم لك الحمد نقوم ابقى لوحدني والله يرحمه زوجي قلوا "الله يطول عمرك بدنا نشوف الحداد لأن أنا ما بسوق". ياخدني بالسيارة نشوف الحداد نشوف النجار نشوف اذا بدنا-- وكمان الله يوجهها الخير مديرة الروضة يني هاي كانت ع طول نلاقيها إنه متواجدة. كمان تروح معي ووين ما بدنا ووين في مساعدات. أو تشوف

ن.ر.: [02:16:31] شو كان اسمها مديرة الروضة؟

س.ع.أ.: [02:16:32] غادة جابر. أعطيت اسمها. إيه بقي خلصنا أمنا الروضة والروضة، طلع إنه بعد في المسنين. لأنه الطفل والمسّن هني لأكثر شي بدن رعاية وبدن خدمة. كمان هون بقدره الله كمان كان في دور لجمعية الزهراء بأبيدجان ورئيستها، كنة النبطية هيام فخر الدين زوجة الدكتور عفيف فخر الدين الله يرحمه اتوفى من سنتين. إيه وكانت رئيسة الزهراء، وكمان عم تشتغل شغل مع كلّ الجالية اللبنانية الموجودة هونكي. يتعاونوا كمان يقوموا بنشاطات كثير ياخذوا مردود، تساعد. مثلاً بعنت على-- للست رباب لمؤسسة الصدر، بعنت عالغازية بلدها هي من الغازية، كمان لما كنا بحاجة بعنتها رسالة إنه كمان أطفال النبطية بحاجة. بعنت مساعدة، بمساعدتها قدرنا نكفي الطابق الثاني. إيه. وبعدين إجوا عالنبطية هي زوجها وبالفعل كان إله دور لأن كتر الأعضاء يا قلبي، إمّا يصير عندن-- يعني يصير عندن مشاكل ما يعود فيهن، يعني الجمعية بدنا تفرغ مش معقولة. وقت إجت ووقتها بيسمحلها سخرت ووقتها، سخرت سيارتها، ووين ما بدّي روح تكون معي. كمان وقت بلشنا نعمل الطابق للمسنين، إيه كمان كنت ووين ما بدّي لأن وقت تجهيزات أو غيره ع طول يعني إله كثير خدمات. قمنا حطينا نحنا هيكي بلاطة باسم جمعية الزهراء بالمدخل إنه بمساعدتها تم هالطابق. بعدين كمان لمن خلص هيدا الطابق ساعدونا فيه، قاعة-- هيدي قاعة للنشاطات سمينها قاعة الزهراء نسبة لجمعية الزهراء. وبعدها عتواصل. هلق هي يفرنسا عند أولادها.

ن.ر.: [02:19:45] قبل-- كنتي قايليتلي قبل إنه الجمعية كان مقرها بمطرح المقاصد، مدرسة المقاصد أو شي؟ وقتها إجوا الدرك أخذوها منك؟
س.ع.أ.: أم--هيديا--

ن.ر.: هاي قبل ما يصير هلق بكفر جوز يعني مقر الجمعية؟

س.ع.أ.: [02:20:04] قبل ما، قبل كفر جوز. قلنا بدال ما نضلنا ننقل من محل محل، في مبنى للزهراء هيدا صار استملكته الدولة. وبعد يمكن بده يكون مبلغ عليهن. المهم يعني بناء، في طابقين. في مهجرين. دغري دبرناهن، طلبنا إذن يعني من لهني مسؤولين عنها. لقوا إنه ما في مشكلة. كلشن معنا وشو جمعنا مصاري، لأنه بده تأهيل ما القصف فجوة بالسقف. إيه. بقينا شي حوالي الأسبوعين أو أكثر بس بين ننظف الجرف والتأهيل إيه، لحتى صار الطابق الأرضي هيكي هيدا عملناه نادي للأطفال، للاشغال وللهدايا بالصيفية. طابق هييك الأول للحضانة للبيبيات، الأربعين يوم للتلات سنين. طابق ثاني لروضة. من التلات سنين للخمس سنين. شو؟ بس خمس سنين هولي انبسطنا فيهن!

ن.ر.: [02:21:42] هاي أي سنة كانت؟

س.ع.أ.: [02:21:44] بال-- بالتمانيات. بدن-- سرية الدرك بدن مكان. دوروا، ما لقوا. مكان مثلاً للريجيه، معرضة للقصف لأ. قاموا هل محبين دلوهن على المركز، قالولن هون قاعدين هيدا مش لإلهن المركز. وأعطونا خبر. وبالفعل كان أسوء يوم

بحياتي وقت تلفنولي لروح افتحلن لحتى نشيل الأعراض. وبروح بلاقي مقوصين القفل بفرد بعمار ناري وعم بضهروا الأعراض. شو الأعراض؟ قفاص للولاد وعريبات وكروسي صغيرة وطاولات وهول وين عم بيحطوهن؟ جايبين شاحنة تبعيت الدرك وعم بيحطوهن وكان أنا وبالتهجير توقفت بناس بدن بيبيعوا مشغل خياطة. اشتريتن. يعني كان في قاعة خاصة بهل مركز مهياة إنه يومًا ما نعمل مشغل خياطة، مشغل للخياطة. خمس مكنا، أربعة على كهربا. وحدة عادية. ومقص كهربائي. وهيك. كمان لقيتن بالشارع. عنجد قتلان لأول مرة هيك. ببكي يعني هيك وبطلع. بقي استحييت قلن شو ها، أكيد لازم مركز لا سمح الله إذا ضمهر أو شي لازم تسكروه. هاي بيناتنا. بقي هيدي كانت كثير صعبة وكمان بلشنا بمركز الولاد وبعد في قصف لأنه لل2000. مناخذ الولاد من محل لمحل. وغير شو تخسري بالكراسي وبالتجهيزات. إنسي إنه لو عطونا خبر بالصيفية، كانوا الولاد راحوا عند أهلهم والبيبيات. في انسان الله يرحمه، عنده على طريق ميفدون، يعني بالمنطقة، عنده شو بيقلوا، يعني-- مستأجر مستودع فاضي قال في يعيرنا إياهن. بس بالصيفية. حطينا الأعراض، غير لتكسر غير لراح. المهم كئا، هني كل فكرن كتار إنه هاي الجمعية بعد يقملها قايمه. خلص. ضلينا ندور للقينا البديل وأخذنا الولاد وضلينا من محل لمحل ومنسعي، لوصلنا إنه حصلنا على الحديقة وعمرنا بقدرة الله وب--

ن.ر.: [02:25:06] يعني اتحاربتوا كثير لأنه مش تابعين لحدنا كنتوا؟

س.ع.أ.: [02:25:10] هون كثير كانت صعبة. كثير صعبة. يعني الوضع كان هوّي هيك. الوضع كان هيك يا قلبي مش لأن، مش لقلنا بس. كان في هيك خطين، هيدي صعبة. إيه، إنك تكوني بهل فريق أو بهل فريق هيدي لخلتنا نضل. يعني وإلا لو نكون لفريق دون آخر، كان أكيد كمان أصعب. بس هيك عرفوا ولمسوا باليد إنه نحنا لإلكن كلكن. للكل. شافونا إنه للكل، ساعتها اتغاضوا وكمان صاروا إذا في مجال يساعدوا ويساعدوا واتغيرت الحالة كثير، ولحد هلق هلق الجهتين المتواجدين عم نتعاون نحنا وإياهن. خلص. هلق كله. ما عاد في، صح في التزام يعني هيك وفي لأ في احترام ومساعدة. يعني شو بيكون عندن مناسبات وقادرين نخدم، منكون معن. الفريق الثاني شو بيتطلب كمان. ونحن إذا طلبنا من الفريقين أي مساعدة، صار في إيجابيات ومساعدة وبالفعل يعني لحد هالساعة كثير في احترام متبادل بين الكل لأن بالفعل شعروا إنه الخدمة كانت عامة للكل، ومحبتنا للكل ومنساعد الكل ومنحترم. ومنقدر كل عمل أو كل خدمة قدموها للجمعية، هادي كثير منحترمها.

ن.ر.: [02:27:17] ما فكرتي تتركي مثلاً التدريس؟ تركتي التدريس وقت ما كنتي بالجمعية ولأ ضلتي تعلمي؟

س.ع.أ.: [02:27:24] ضلتي علم، كان بعدلي شي ثلاث سنين لأطلع تقاعد. وقتها صار قصف واتضرر هيدا يعني مش باص كبير، لأ. باص صغير في أطفال اتعرضوا للقصف، وقتها اتوفى ولد. مش لإلنا، بس إنه اتوفى طفل. ساعتها قتلته لزوجي إني رح أقدم استقالتني. وكان السنيرة قال إنه كذا ليحب يقدم استقالته، سواء كان—أنا كان فيني أقدم استقالتني يعني لأنني— شو، 42 سنة تعليم. يعني بعدلي سنتين ثلاثة بطلع عالتقاعد. قَدَمْت استقالتني وهيدي كان فخر لأن راح عليّ مبلغ. إيه شي ثلاث أربع درجات كان، وعارفة وقلّي اصبري قتلته "الحمد لله، ولادنا أمناهن مش بحاجة لحدنا. دخيلك بدي هالولاد. بدي هالولاد هيك ضلني راقبهن أشرف وهيك لأنني ما بعرف شو القصف وأيمتى وبيطال وكذا". إيه الحمد لله.

ن.ر.: [02:28:54] طلبتك وقتها الدكتورة مديرة مدرسة البنات كانت الدكتورة دلال [عباس] طلبتك تيجي.

س.ع.أ.: [02:29:03] دلال. أول شي، الدكتورة دلال من—من أول تأسيس الجمعية كانت عضوة، صبية كلن دخلوا 17 و18 وهيكي. إيه عشرينات وهيك. من أول ما تأسست الجمعية، كانت الست دلال، كانت عضوة. وعضوة حرزانية. هلق، وقت لصارت مديرة بالتأنيوية، وبعد ال83 وبعد ما رجعوا المهجرين، رجع الوضع بالمدرسة كثير صعب وخاصة عند الثانويات. شباب وصبايا، في مترمتين يعني هيك بيلبسوا باللبس وفي لأ، هيك عندن ردة فعل يعني إماما—شو إسمن؟— [تسال نسرين-غير واضح]

ن.ر.: إماما مترمتين كثير— أو إنو

س.ع.أ.: [02:30:19] لا—بناطلين—شو إسمن؟

ن.ر.: جينز

س.ع.أ.: [02:30:24] جينز، إماما لابسين جينزات أو لابسين لأ عباية وهيدا. إيه وكمان الشباب جايبين هيك بشراسة.

ن.ر.: أوف، هاي من بعد الحرب

س.ع.أ.: [02:30:41] بتفاجئ بالست دلال بنقلّي رح ابعت على الدائرة أطلبك تيجي مرشدة اجتماعية دخيلك. دخيلك هون صبايا وكل واحد قاعدين هيكي الندّ للندّ وكل واحد بعقلية وكل واحد-- بحاجة. قتلها ما عندي مشكلة. وحياتك.

ن.ر.: [02:31:09] كنتي وقتها بعدك بتعلمي، ما هيك؟

س.ع.أ.: [02:31:10] إيه. دغري طلبتني من النموذجية. طلبتني من النموذجية، هاي بالتمانينات كمان. بعد ما طلبتني وجيت وبالفعل لقيت ياما في مشاكل من بعد هيكي. وشو بدي؟ أعطيهن هيك تدبر منزل، أعطيهن بعض إرشادات ونصائح. أعطيهن يعني، أمل وبالمستقبل وشو دوركن وشو هيك. وينبسطوا. وكمان مرق طبخة من هون، أكلة جاتو يعني بيحفظوها أو يكون في محاضرة وبالفرة ما شوف إلا ييجوا لعدنها مشكلة، تيجي تحكيلى مشكلتها. ما هاي لعم فلك لأن كان وضع حرب. الام مش فاضية عم تنظر يصير قصف وأولادها بعدن بالمدرسة. مش مهياة تسمع هالصبية شو عندها. والكمان

الأستاذ قاعد وبيبطلع وناظر الساعة وهالولاد يكونوا على الطريق. كان دوري كثير مهم، مرشدة اجتماعية. هيك: إخت، إم، رفيقة. هيك فتحولي قلبن، شو عندن شغلات. كثير كان إلي دور والله يخليها بصحتها الست دلال يعني إجا اختيارها بمحلها. ن.ر.: [02:32:54] ايه، وكيف ربيتي ولادك؟ لقيتي صعوبة شي؟ لما كنتي تربي ولادك وكانت عندك الجمعية ويعني صاروا صبايا وشباب وعندك الجمعية وعندك التدريس وكذا مهمة، كيف قدرتي تربيهن؟

س.ع.أ.: [02:23:10] كان، يا قلبي،

ن.ر.: بتوصفيلنا نهار مثلاً، شو كنتي تعملي—من بدايتو

س.ع.أ.: [02:33:17] هلق بس يجوا يا قلبي بالبيت [Stop]، خلص كان هيدا—صار هني وين صاروا بدروسن واكيهن، وين صاروا. وكمان وقت القصف ما بنتي بعثوها على صيدا انكفي ترمينال [Terminal]، يروح قلبنا معها. والحمد لله، مرّات مرّات اولادي ينفروا شو-- يقولولي يعملوا مظاهرة بالبيت "أو بتتركي الجمعية أو رح نترك البيت". ما في سبب إنه يلاقوا مقابل شغلي شو عم بيكون الردّ لبعض أشخاص. مثلاً بتعرفي، بيصير في "إمنا"، يعني مش الكل، في جماعة ما بيحبوكي تكوني ناجحة وهيكة منطلقة وبعدين يكون هيكة نشاطات. هيكي. يعني كثير لاقني في صعوبات بشغلي. لاقوني عم بتعب وبالمقابل شو عم بيصير؟ يعني الله لا يعطي حدا عافية! وأني آخر همي! هول انتقدوا عملوا ساووا، أن هيكة بقدره الله. والله عم بيوقف الولاد، ما عش فارقة معي. قتلن "الله عم بيوقفك يا ماما لأن عم بخدمه. معلش معلش. طيب ما هيدا عمل انساني". حتى زوجي، مرقت فترة بالأول اتضايق، لمن شافني إنه بالبيت ما في تقصير. بيجي عالبيت يعني خلص، كله صار برّاً. ولقي عملي انساني وهوي مؤمن، ساعتها من قلبه صار يساعدي، يعني اتغير. بالأول أكيد مش على شي، يقلي "انا لقا هرنو إنو ست ساعات عم بتعلمي وبتيجي عالبيت كمان بدك تراقيهن وشو؟ بعد عحساب صحتك". يعني يصير بده إنه يشفق عليّ، مش إنه ضد عملي، مع العمل بس كمان إنه اشفقي عحالك مثلاً. ساعتها يعني لمن عرف إنه العمل كيف انساني مش تضبييع وقت ولمن عرف إنه بالبيت ما في تقصير أبداً، ولمن عرف إنه الولاد الحمد لله كتر خير الله طلوعوا أذكيا وشاطرين والحمد لله ما تعبونا. إيه الحمد لله يعني أكيد أكيد مرقتا بظروف صعبة. وقت لتهجير قديه صعبة، ووقت كمان هون القصف ولما بتروحي عمدرستك وكمان يعني. إيه يعني عنجد عنجد، شي ربع قرن هيدي كان كثير هيكة صعبة. بس الحمد لله الحمد لله هلق بس مثل الحلم بطّلع. هلق مين ما طلع وإجا شاف المركز، ما بيتخلوا إنه انسانة رغم القصف ورغم— مرّات ما يبقى حدا، مرات إن كتر إذا كانت عادة. ومرات الله يرحمه يطل يشوف شو عم يعملوا شغيلة وهيدا. وكمان، ربنا يا قلبي ربنا يبسر ربنا هيكة يفتحها. إيه بقى بس يشوفوا— في انسان إجا عملنا زيارة، فات. قلي "صدقا صدقا جايي من أميركا وكنت عند إمي، وإمي بمركز مركز للمسنين". يعني هيكة مثل مش إنه— نادي. إنه نادي نهاري بس. قلي "صدقا صدقا مش مثل هون. بتسجلولي اسمي؟". عم يضحك. مين ما إجا يا قلبي، مين ما إجا ويشوفوا ثلاث طوابق والتجهيزات والخيمة لبرا والحدائق والأرض لبعدها، هيدي كمان فيهن يستغلوها. ما بيحمل راسن. وكله كيف؟ كله شغل تحت القصف. وبالحرط مش إنه شغل هيكة بوقت أمان واطمئنان. لأ.

ن.ر.: [02:38:24] يعني كنتوا تؤمنوا تمويل من الدعم والعلاقات الاجتماعية؟

س.ع.أ.: [02:38:27] الدعم يا قلبي كمان، مثلاً في—السفارة اليابانية يعني في جهات رسمية.

ن.ر.: كيف بتعرفوا عنهن هول؟

س.ع.أ.: [02:38:36] إيه، السفارة اليابانية اتصلنا، ساعدتنا، مدت شو اسمه [chauffage] للروضة وللحضانة وبعدين ساعدتنا مرة ثانية عملنا برّ، برّ مش ارتوازي، برّ للمي. إيه وكمان رسالة لقرابتنا بأبو ظبي، بيعرف الهلال الإماراتي هونيك. وحياتك، اتصلنا فيهن "دخيلكن بدنا للمسنين، بدنا باص". بعقولنا باص. بعدين، سيدات من النبطية برّا نتصل فيهن، علا بدر الدين بدبي. إيه. من نساء دبي مرّة جمعنا مبلغ. كمان ست تانية بعنت مبلغ. يعني— وغير أهل النبطية يا قلبي هون، الهون والمغتربين. هول كان إلن دور يعني ما فيي عد لأنه اللهم لك الحمد، ما نطلب من حدا وإلا بيعطي لبيقدر عليه. هيدي نعمة. بقى يعني هلق أني وعم بكتب بخاف أذكر أسماء وأترك حدا لأن عنجد عنجد. وكمان بالمقابل، الحمد لله، عرفوا تعبني يا قلبي، وصار تكريم لإلي من عدّة جهات. من عدّة جهات. مع دروعة وهيكة. يعني الحمد لله إنه بالمقابل كان في تقدير كمان إنه لقت في، الحمد لله. إيه. لأ— بقى هاي رحلة ال 62، 63 سنة. لأن بين التعليم الرسمي، ما بلّشت بال-- افترضني ال 53، لل 2015، لنيسان ال 2015 لتريكت شغلي والجمعية. احسبي قديش. 62، 63 سنة. هول شغل، بين التعليم وبين الشأن العام والجمعية. هيدي مسيرة اللهم لك الحمد، بفضل ربنا والله يرحم روحه، كمان مرق بظروف مرض قعدّه 15 سنة ن.ر.: شو كان مرضه؟

س.ع.أ.: [02:41:45] اللازهايمر، بس الحمد لله، ضميري مرتاح انو قدرت هيكي قدام اللي بقدر عليه، إيه وهيدي كلها بفضل ربنا يا قلبي بيعطي هوي الصحة. بيعطي التدبير وبيعطي التوفير وكله هيدا الحمد لله.

ن.ر.: [00:22:26] كيف اكتشف إنه عنده هيدا المرض؟ كيف اكتشفته؟

س.ع.أ.: [02:42:15] اكتشفنا-- عم قله مرة إنه إذا بدنا نبعث هالحرامات على المصبغة. قال وين؟ قتلته بالمحل الفولاني. قال وين؟ قتلته يا عمي حداً! نفزت. شغلة—شغلة ثانية، مرّة، هوي بيروح الصبح مرّات يخلق. إيه، بس قبلها، لما حسينا إنه عم ينسى يعني نروح عالدوير عند خيآته، ينسى الحمام وين. ينسى محل يقولوله في محل الفلان عنده هيكة. يقول وين

هوي المحل؟ [تسهق] به. ابني بأميركا بعته بر، هوي بده إيانا إنه نحنا نروح لأنه طلع تقاعد، يعني سنة التقاعد عمره 64 سنة بلش الزهايمر. قلته يا ماما دخيلك عملي موعد مع طبيب أعصاب. وهوي شغله هو هندسة صناعية بس كمان إدارة مستشفيات، يعني بيعرف الأطباء. عملنا موعد ورحنا وأميركا. رحت عند الحكيم، قالوا لإبني، قلّه لإبني بداية الزهايمر، بديكن تنتبهوا للفرندات، بديكن تنتبهوا لل لكل شي. قلّه لإبني "بس ما هني بأميركا مش بالألوف، يمكن فوق المليون. في كثير الزهايمر بأميركا لأنه ما في رابطة عائلية. بعيش لوحده بتصير كابة. كابة بتصير ألزهايمر". قلّه "بس عيلة ماما كبيرة وعيلة بابا كبيرة". وبالفعل، تبين صاحب هالمرض بده عاطفة.

ن.ر.: [02:44:09] كان ناقصه عاطفة يعني؟

س.ع.أ.: [02:44:10] أول ما _____ بضل إنه مين حواليه وعمّا بيخدمه وعمّا بيحكي معه. أول خمس سنين كان النسيان يعني بس بسيطة، بعدين ثاني خمس سنين وحتى خلال أول خمس سنين وقف السواقة. قلته ما عش تسوق. لقيت كمان إيده اليمين تعبانة عم ترجف. وقفنا السواقة. إيه، ل مرة-- مرة وحدة بس راح عند الحلاق الصبح-- إله بالعادي يرجع دغري. راح الوقت، صارت يعني شي ساعة، دغري لبست ورحت التفتت بسيارة جايي وجايته، الشوفير بيعرفنا. قلّي لقيته مفتح. وقلّي يا عمّي ضعت مدري، عاليبت وصلته. ومن وقتها، صرنا ننننه ضهوره وغيرها وهيدا. إيه بس الحمد لله الحمد لله إنه لأخر دقيقة ومرق هيكي واقف هيكي انكسر وركه، ما كان يظهر خالص. كمان اتعرض-- عمل، عمل عملية كمان هيدي زادت الاوجاع، بس الحمد لله كان الممرض، كانت الخادمة، كان في يعني مين يهتم فيه. يعني وبالبداية لأنه بعدين ما عش يعرف حدا. حتى انا ما عاد يعرفني. إيه، أول شي مثلاً إخوته هات لنعد إخوتك، إيه يصير هيكي ينسى. طيب في مرة كمان بعد فترة، إيه قلّه أنا شو بقربك؟ قلّي إختي. قلّه عال، إختك. وهيكي. وإذا شوية تأخرت، كثير هيكي يستفقد. يعني هيكي يستأنس إني ضلني. ضلني حده. ومع هيدا وكله، لم، صار مقعد ما عش فيه مع عملية وهيدا، صار في ممرض وأني صار إلي دور والبنيت إليها دور والممرض إله دور.

ن.ر. كل يوم كان يجي الممرض؟

س.ع.أ.: [02:46:39] صرت يا قلبي بس يكون نايم، كيف ال[bebe]، بتدبريله كل حاجياته، وروح عالجمعية. هيدي هالضهرة كثير تعطيني، يعني فرق ما ضلني قاعدة أشوفه بحالة هيكي، بدون ما انتبه يعني أنا مش [غير مفهوم] دخل إسمه ربناء، هيدي إرادة ربناء. بس نفسياً هالضهرة عالجمعية شوف شو شغل حالي، هيكي بالوقت يللي فيني إضهر فيه وإجي. اللهم لك الحمد. اللهم لك الحمد. يعني بقدرة الله ضميري مرتاح، 15 سنة أبدأ—دهر. عمره 64، اتوفى كان عمره 69. هول كلن كان فيهن أوجاع ومأساة وهيكي.

ن.ر.: [02:47:40] يعني خمسة وستين-- خمس سنين يعني، خمس سنين كانت معاناة إنه—
س.ع.أ.: نعم؟

ن.ر.: خمس سنين كانت معاناة، إنه--

س.ع.أ.: [02:47:47] آخر شي هو أصعب شي لمن ما عش

ن.ر.: أه، من 64 لل 69

س.ع.أ.: [02:47:53] يقوم وقت لوقع والعملية. أما كان نجيبه عمهلنا. إن شفت رجال يساعدي، بس إني فوته عالحمام ويقعد-- يعود هوي يجيبه. ما دام عم جيبه ويقعد معنا ما في مشكلة، وباخده وكمان بينام بالتخت طي. بس وقت ل--بل مرة، وعي كمان زاد [غير واضح] كمان وعي، مع الوجة مع هيدا. يعني خاصة آخر خمسة أشهر هول يعني لمّا، تشوفيه عم يتألم وموجوع، هيكي خلص! إيه ولا ولا حاسة بشي. يعني بعد ما اتوفى بشي جمعة، ييه! بلشت حس، لقيت إدي-- قلت يمكن كل الوقت كانت توجعني إيدي وهيكي افكر حاملة شي جيب مشد أو غيره. يه! عم يوجعوني. عملت فحص، لقينا الروماتيزم. بال 2012 بلش الروماتيزم، بعد وفاته. إيه. بس الحمد لله، الحمد لله بقي عكرامته، بقي بيته ما إنه اتشمشط وأخذناه عمستشفى وهيكي، أبدأ. الممرض يجي عاليبت والبنيت هون بنت قوية. وفي مرة كانوا اتنين بس لقيت كثير وجعة راس، لقيت ببيت في وحدة [غير واضح] تبين، اكتفيت بوحدة شاطرة وأمورة. إيه وهاي بعد ما اتوفى بأسبوع. وبالصيفية، بعد شي 7، 8 أشهر، ابني بعث ورايي وأميركا غير جو. البنيت لأنها خدمته بعثها شهر اتشق على أهلها، هيكي على حسابنا ورجعت، قلتهلنا لأنك تعبتي معي إنتي و—

ن.ر.: [02:50:09] كل ولادك مسافرين؟ كل ولادك هلق مسافرين؟ الثلاثة؟

س.ع.أ.: [02:50:14] لأ، بنتي هون. بنتي كفت أدب إنكليزي وعم بتعلم بثانوية الراهبية-بيروت. وابني بدبي، كان هون وكان معمّر مدرسة ثانوي. إيه كان يعني عنده مدرسة وكان عال. بعدين اتغيرت شوية الأحوال. هلق هوي بدبي والله يخلي كل الشباب، عنده شبين كمان. خلصوا، عمّا بيشتغلوا. مرته هون ب-- استأجروا بناء مدرسة، وأختها وصهرها، وهينة تعليمية، عم بتعلم. إيه وبقي شبين، ما هني إيه الله يحمي كل الشباب أربعة، بقي هون تبين معاي. الثالث خلص طب هلق ببيروت عمّا بيشتغل هيكي يتمرّن لبال ما يشوف شو بيعمل اختصاص. وكمان أصغر شي خلص، خلص جامعة وعم بيعمل إخراج. هو التنين بعدن هون مع إمّن، ومن غير شر تبين مع أبوهن. وعلي الصغير بأميركا.

ن.ر.: [02:51:53] هلق عايشة لوحدهك بالبيت ماهيك؟ مع-- عايشة لوحدهك بالبيت [تعيد لها السؤال]؟

س.ع.أ.: [02:51:59] إيه، هَلَقْ بنتي، هَنِّي فرصتها سبت وأحد بس أعطوها التنتين بس ليتكَمَشُوا فيها وهَيِّي حاولت هون، يعني بأيا جامعة أو أيا ثانوية بس ما اتوقفت لأن— ما هَيِّي صرلها زمان عندها خبرة وهيدا. إيه. بالجامعات الخاصة مش الجامعة اللبنانية. يَطْلَعُوا يعني بدون ما يعرفوا قديش بدن يعطوها يعني ولا هَيِّي تطلب، بس يتطلعوا فيها، إنه بيجيبوا معلمتين محلها، لأن بالنسبة إليها الملف تبعها وخبرتها وقديه صرلها ولغتها إيه، بقي يعتذروا. وهَيِّي مبسوطه كثير فوق لأنن ماعطينها حقها وقلبتن المدرسة قلب— كثير كثير ناجحة وبيقدرُوا. والحمد لله، بنتجي الجمعة بعد الظهر، سبت وأحد، للاثنتين. يعني ثلاث أيام بنتجي والحمد لله. ماشي الحال. هَلَقْ ما هَيِّي مجوزة شب وبنت بأميركا، وشب هون، ما بيشتغل. بقي ابنها بيجيه صبي أول حفيد لإلي. ناطرة بتموز بس ياخذ الفرصة أول تموز بتروح بتطل عليهن.

ن.ر.: [02:53:57] كيف بتوصفي بيتك؟ كيف بتوصفي بيتك؟

س.ع.أ.: [02:54:03] بيتي، أول شي المنطقة-- المنطقة يعني تقريباً بالنسبة لبقية المناطق، تُعتبر مش أرقى شي أو لا، بس موقعها. يعني قريبة للسوق وبعيدة عن السوق. وبعدين رواق، رواق. وبعدين بناء مرتب وجيران كثير طيبين. وكل وسائل-- يعني بالشتا [chauffage]. كل وسائل التدفئة، وسائل-- يعني مريحة. مريح وواسع والحمد لله.

ن.ر.: [02:54:53] كيف بتقضي يومك؟

س.ع.أ.: [02:54:55] والله الوحدة صعبة، بس عمّا بجرب، عم جرب يعني أعمل، بدي توثيق لرحلة ال 62 سنة، 63 سنة. عم بعمل هَلَقْ كتاب هيك: رحلتي بالتعليم وبالشأن العام. عم بتسلى فيهن، وعمّا بشغل بالها ل--

ن.ر.: بتعملي زيارات.

س.ع.أ.: [02:55:36] كل ساعة صلحيلي هيدا وغيري هيدا [تضحك] لنسرين الأمورة، لكمان إليها دور الله يرضى عليها عم تطبعلي الأوراق، عم بتساعدني. بقي كثير إليها دور. وبعدين يا قلبي بتصفح الجريدة شوي لأنه ما في أخبار تسرّ القلب بس بتكَمَشْ بالكلمات المتقاطعة ليضل شغل إيه، شغل لأنه-- شو بالتماينينات يعني الواحد بده بقنعني، اللهم لك الحمد، إنه دور الواحد بسمعه بعقله بـهيدي نعمة. بقي-- ومرات بنزل عند الاهل ببيروت بالشتا بطل عليهن. وهون كل المناسبات، مناسبات هيكي، ثقافية أو غيرها، يعني أيا نشاط أو أيا جمعية أو أيا نادي بيكون عندن نشاط، أكيد بيعتولي دعوة بحضر. يعني بعدي عايشة بأجواء حلوة ضمن كيف الصحة بتساعد. الحمد لله كثر خير الله. هيدي نعمة. وهَلَقْ أنا كان بدي أشكرك على هل وقت لقضيتيه وعلى هالسعة الصدر وعلى هالسؤالات المركزة، وإلك عندي خدمة قبل هاي الخدمة كمان، بالنسبة للكتاب، بقي بدعيلك بالتوفيق

ن.ر.: الله يخليكي

س.ع.أ.: [02:57:31] وبالفعل بتستاخلي يعني تكوني بموقع يناسب ثقافتك، يناسب هيكي حيويتك، حماسك. بقي بتمنالك يا قلبي أيام حلوة، بتمنالك النجاح والتوفيق وبشكرك عهد اللقاء العفوي الحلو

ن.ر.: [02:57:58] انشاء الله ما كون تعبتك

س.ع.أ.: [02:58:00] ما ناسية التعب لأني مبسوطه

ن.ر.: وأنا مبسوطه بحكياتك

س.ع.أ.: [02:58:06] مبسوطه. عن شغلك بنبسط. بنبسط هيك، ولو كان هيك على اختصار بس بنبسط لأنه بترجعيني لهيك لأيام حلوة لأنه بهل إيام ما في شي يسر القلب. عشان هيك من قلبي يرجع.

ن.ر.: [02:58:26] شكراً إلك.